

唐張司純詩集

一  
函  
冊

唐司業張籍詩集序

世宗

唐開元盛時杜甫李白高適儲光羲王維諸賢至大曆以後已兩變矣當時以文名家者有韓愈柳宗元李翱張籍之徒相與奮起振六朝五季漓澆之習而自成一家人之言韓昌黎柳州李協律集俱盛傳惟張司業按唐史云有集七卷不傳余登進士同年沁水常倫明卿授以錄本蓋以乃翁侍御所藏者惜不見其全集所幸有古體七首今體三伯四首後余於載籍中又得樂府五七言古詩三十首今體五十二首而次編之共得三百九十三首夫詩文至五季壞



亦極矣而元和中昌黎公特振衰頹以古文自任其  
議論正大氣象雄偉可以羽翼六經而柳宗元得敘  
事之體變化莫測起伏層迭昔人評其文曰韓愈之  
文出於經柳宗元之文出於史故一時文人響應而  
李翱張籍出入門下爲昌黎厚友籍性狷直率博聞  
好古議論勝人其排佛老嘗言不能著書如孟軻楊  
雄以垂世觀其昌黎代作李浙東一言議論風生期  
大之意甚深謂其善爲樂府使人憑几而聽之未必  
不若絲竹管絃敲金擊石也其送孟東野序曰孟郊  
東野始以其詩鳴高出魏晉從吾遊者李翱張籍其

尤也三子者之鳴信善鳴矣抑不知天將和其聲而使鳴國家之盛邪抑將窮餓其身思愁其心腸而使自鳴其不幸邪三子之命則懸于天矣其在上也奚以喜其在下也奚以悲韓愈之哀三子之才至於如此余并其詩而觀之其樂府詩景真情真有風人之意而五言近體又皆勁健清雅脫落塵想俱從胸臆中出然後知昌黎之詩豐而腴柳州之詩峭而勁司業之詩新而奇李翱之詩悲而壯卒皆可傳惟東野之詩則有窮促寒苦之狀吾恐溫厚之教或不若是觀者自有巨目不待余贅言也今昌黎原道功業爲

唐獨出血食廟庭而柳州李翱張籍之文爲世所珍  
是和其聲而鳴其盛非窮悲而自鳴矣而今而後知  
人能文章其命之遇與不遇蓋不足悲喜也張籍字  
文昌和州烏江人貞元十五年及第歷官大祝秘書  
郎昌黎薦之遷國子博士轉水部員外郎歷主客郎  
中卒授國子司業云

正德乙亥秋七月吉河中夏峰劉成德序

唐張司業詩集目錄

卷之一

五言古詩

野居

西州

雜怨

三原李氏園宴集

七言古詩

寄遠曲

行路難

征婦怨

白紵歌

野老歌

寄永曲

送遠曲

築城詞

猛虎行

別離曲

牧童詞

沙堤行呈裴相公

求仙行

古釵嘆

各東西

節婦吟

讌客詞

永嘉行

採蓮曲

傷歌行

吳宮怨

北邙行

關山月

少年行

白頭吟

將軍行

賈客樂

羈旅行

車造遙

妾薄命

朱鷺曲

遠別離

楚宮行

江南行

烏啼引

促促詞

宛轉行

卷之二

五言律詩

薊北旅思

江南春

西樓望月

別鶴

江陵孝女

山中古祠

漁陽將

聽夜泉

送南遷客

薊北春懷

思遠人

贈同谿客

望行人

送宮人入道

送越客

贈辟穀者

思江南舊遊

夜到漁家

送遠使

不食姑

古苑杏花

送流人

宿臨江驛

送蠻客

襄國別友

送遠客

上國贈日南僧

征西將

寄友人

送防秋將

律僧

山中秋夜

送南客

宿江店

嶺外逢故人

出塞

寄紫閣隱者

夜宿黑竈谿

古樹

送徐先生歸蜀

隱者

送友人歸山

雲谿西亭晚望

哭山中友人

答僧拄杖

霧都觀李道士



送韋評事歸華會

送閻僧

送海客歸舊島

登咸陽北寺樓

送新羅使

宿廣德寺寄從舅

宿邯鄲館寄馬磁州

舟行寄李湖州

送閔師歸江南

遊襄陽山寺

登城寄王建

送從弟戴玄往蘇州

送朱慶餘及第歸越

過賈島野居

酬韓庶子

贈姚合少府

送僧遊五臺兼謁李司空

送鄭秀才歸寧

送李評事遊越

閑居

寄昭王中丞

酬孫洛陽

送人任濟陰

晚春過崔駙馬東園

晚秋閑居

和裴司業習靜寄所知

酬韓侂酒雨中見寄

和裴僕射移官言志

酬白二十二舍人早春曲江見招

酬陸僕射朝回寄韓吏部

春日李舍人宅見兩省諸公唱和因書情即事

和李僕射秋日病中作

早春病中

送嚴大夫之桂州

詠懷

留別江陵王少府

使至藍谿驛寄太常王丞

贈海東僧

寄漢陽故人

送安西將

題李山人幽居

早春閑遊

贈太常王建藤杖筓鞋

和周贇善聞子規

送李騎曹靈州歸觀

寒食夜寄姚御

題清徹上人院

和裴司空即事通簡舊僚

使回留別襄陽李司空

和吏部令狐尚書喜裴司空見招看雪

和裴司空以詩請刑部白侍郎雙鶴

同綿州胡郎中清明日對雨西亭宴

莊陵挽訶詞

三首

和左司元郎中秋居

經王處士原居

不食仙姑山房

江頭

寄孫冲主簿公

贈任懶

舊官人

春日留別

沒蕃故人

卷之三

五言排律

和李僕射雨中寄盧嚴二給事

酬李僕射晚春見寄

憶盧常侍

寄華山鄭隱者

和令狐尚書平泉東莊近居李僕射有寄

送鄭尚書出鎮南海

徐州試反舌無聲

省試行不由徑

新城甲仗樓

贈殷山人

夏日可畏

罔象得玄珠

和李僕射西園

卷之四

七言律詩

送裴相公赴鎮太原

寄元員外

贈梅處士

贈王秘書

謝裴司空寄馬

酌秘書王丞見寄

送李餘及第後歸蜀

早朝寄白舍人嚴郎中

書懷寄元郎中

贈僧道

書懷寄王秘書

題韋郎中新亭

送揚州判官

喜王起侍郎放牒

贈王司馬

書懷

贈令狐博士

送從弟刪東歸

贈王秘書

哭丘長史

送枝江劉明府

送從弟徹東歸

哭十八遇

贈賈島

逢王建有贈

移居靜安坊答八郎中

送楊少尹赴鳳翔

送韓侍御歸山

新除水曹郎答賀

送楊少尹赴蒲城

哭元九少府

送侯判官赴廣州從軍

答白杭州登望園見寄贈趙將事

送和蕃公王

寒食內宴二首

朝日勅賜櫻桃

太白老人

和裴司空酬滿城楊少尹

寄和州劉使君

贈商州王使君

寄令狐賓客

寄梅處士

送施肩吾東歸

崑崙兒

贈李杭州

送鄭尚書赴廣州

拜豐陵

贈孔尚書

酬杭州白使君兼寄浙東元大夫

寄蘇州白二十二使君

賀秘書王丞南郊攝將軍

送令狐尚書赴東都留守

送白賓客分司東都 贈闔少保

贈別王侍御赴任陝州司馬

田司空入朝

送浙西周判官



送胡鍊師歸王屋

送邵州林使君

寄王六侍御

送稽亭山寺僧

送汀洲元使君

寄孫洛陽格

胡山歸王屋因有贈

寄處州韓使君

送從弟濛赴饒州

羅道士

寄陸渾趙明府

贈王侍御

同蔣希二少監贈李郎中

送金少卿副使歸

新羅

送李司空赴鎮襄陽

送李僕射赴鎮鳳翔

寄白二十二舍人

卷之五

五言絕句

和韋開州居山十二首

宿雲亭

梅溪

茶嶺

流杯渠

盤石磴

桃塢

竹巖

琵琶臺

胡蘆沼

隱月岫

繡衣石榻

上士泉餅

送遠客

寄西峰僧

禪師

惜花

題暉師影堂

涇州塞

野田

岸花

卷之六

七言絕句

送蜀客

送元結

宿山祠

美人官碁

蠻州

送元宗簡

寄徐晦

寄白學士

喜王六同宿

題玉像堂

與賈島閑遊

哭丘長史

哭孟寂

患眼

答劉兢

贈華嚴院僧

逢故人

送蕭遠弟

送辛少府任安縣

贈任道人

招周居士

送許處士

送律師歸婺州

題楊秘書新居

送暉師

送僧往金州

尋徐道士

答開州韋使君

寄車前子

憶故州

送客遊蜀

送陸暢

感春

贈李司議

別客

登樓寄胡家兄弟

答劉明府

酬藤杖

法雄寺東樓

寄故人

鄰婦哭征夫

和崔駙馬聞蟬

和裴僕射看櫻桃花

和長安郭明府與友人縣中會飲

唐昌觀看花

九華觀看花

贈姚合

同常員外開元觀尋時道士

同韓侍御南谿夜賞

使行望悟真寺

重陽日至峽道

贈主客劉郎中

同嚴給事聞唐昌觀玉蕊近有仙過作二首

秋思

憶遠

玉仙館

寄府吏

張蕭遠雪夜同宿

涼州詞三首

宮詞

華清宮

崔駙馬養鶴

閑遊

劉兵曹贈酒

送梧州王使君

春日早朝

寄朱闕二山人

寄李渤

尋仙

同白侍郎杏園贈劉郎中

答鄱陽客藥名詩

寄宋景

寄王奉御

題涓北寺上人

閑遊

倡女詞

答元八遺紗帽

題僧院

送元八

吳楚謠詞

題方睦上人月臺觀

華山廟

病中酬元宗簡

寺宿齋

贈施肩吾

贈王建

逢賈島

楚妃怨

離宮怨

成都曲

寒塘曲

春別曲

臺城

春詞

浪淘沙詞

傷愚溪二首

聽舊宮人穆氏唱歌

楊柳枝詞二首

宿都庭有懷

無題

堤上行二首

竹枝詞五首

楊柳送客

送客還幽州

楊州送客

隋宮燕

山禽

秋山

王貞觀

蠻中



贈道士

重平驛作

宿天竺寺寄盧隱寺僧

卷之七

樂府三十三首

隴頭燈

廢宅行

秋夜長

塞曲

董逃行

江村行

湘江曲

白鼉吟

樵客吟

春江曲

烏棲曲

短歌行

泗水行

雲重行

長塘湖

雀飛多

寄菖蒲

山頭鹿

憶遠曲

春堤曲

湖南曲

春水曲

送遠曲

楚妃怨

春日行

廢瑟詞

洛陽行

懷別

離婦

新桃

惜花

古風二十七首

董公詩

學仙

沈千蓮舊居

懷友

寄韓愈

別段生

贈姚愆

傷于鵠

和李僕射西園

獻從兄

南歸

臥疾

贈孟郊

城南

夜懷

奉和舍人叔直省特恩

琴

野寺後池寄友

寄別

病中寄白學士拾遺

雨中寄元宗簡

岸花

惜花

別于鵞

野艸

秋山

山禽

祭退之

野居

卷之八

一十九首

山中醜人

岳州晚景

水

送安法師

寄需一上人初歸雲門夏日閒居

老將

秋閏

山中春夜

誦浙東元尚書見寄

贈項斯

題故僧影堂

弱柏院僧影堂

聯句

會合聯句

春池汎舟

宴興化池亭

首夏猶清和

薔薇花

西池落泉

唐張司業詩集目錄

終

唐張司業詩集卷一

國子司業張籍 文昌

五言古詩

野居

貧賤易爲適荒郊亦安居  
端坐無餘思彌樂古人書  
秋田多良苗野水多遊魚  
我無耒與網安得充廩厨  
寒天白日短簷下煖我軀  
四肢漸寬柔中腸鬱不舒  
多病減志氣爲客足憂虞  
况復時節晚覽具獨踟蹰

西州

羗胡據西州近甸無邊城山東收稅租養我防塞兵  
胡騎來無時居人常震驚嗟我五陵間農者罷耘耕  
邊頭多煞傷士卒難全形郡縣發丁役丈夫各征行  
生男不能養懼身有姓名良馬不念秣烈士不苟營  
所願除國難再逢天下平

雜怨

切切重切切秋風桂枝折人當少年嫁我當少年別  
念君非征行年年長遠途妾身甘獨歿高堂有舅姑  
山川豈遙遠行人自不返

三原李氏園宴集

暮春天早熟邑居苦囂煩言從君子樂樂彼李氏園  
園中有草堂池引涇水泉開戶西北望遠見嵯峨山  
借問主人翁北州佐戎軒僕夫守舊宅爲客施榻筵  
高壤有餘滋竹樹芳且鮮傾我所持觴盡日共留連  
踈拙不偶俗常喜形體閑况來幽棲地能不重笑言

七言古詩

寄遠曲

美人來去春江暖江頭無人湘水滿浣沙石上水禽  
栖江南路長春日短蘭舟桂楫常渡江無因重寄雙  
瓊璫



行路難

湘東行人長嘆息十年離家歸未得弊裘羸馬苦難  
行僮僕飢寒少筋力君不見牀頭黃金盡壯士無顏  
色龍蟠泥中未有雲不能生彼升天翼

征婦怨

九月匈奴殺邊將漢軍全沒遼水上萬里無人收白  
骨家家城下招魂葬婦人依倚子與夫同居貧賤心  
亦舒夫死戰場子在腹妾身雖存如晝燭

白紵歌

皎皎白紵白且鮮將作春衣稱少年裁縫長短不能

定自持刀尺向姑前復恐蘭膏汗織指常遣傍人收  
墮珥衣裳着時寒食下還把玉鞭鞭白馬

野老歌

一作山  
農詞

老翁家貧在山住耕種山田三四畝苗踈稅多不得  
食輸入官倉化爲土歲暮鋤犁倚空室呼兒登山收  
橡實西江賈客珠百斛船中養天長食肉

寄衣曲

織素縫衣獨苦辛遠因回使寄征人官家亦自寄衣  
去貴從妾手着君身高堂姑老無侍子不得自到邊  
城裏慙慙爲看初着時征夫身上宜不宜

送遠曲

戲馬臺南山簇簇山邊飲酒歌別曲行人醉後起登  
車席上回尊勸僮僕青天漫漫覆長路遠遊無家安  
得住願君到處自題名他日知君從此去

築城詞

築城處千人萬人抱把杵重重土堅試行錐軍吏執  
鞭催作遲來時一年深磧裏盡着短衣渴無水力盡  
不得休村聲杵聲未定人皆死家家養男當門戶今  
日作君城下土

猛虎行

南山北山樹冥冥猛虎白日繞林行向晚一身當道  
食山中麋鹿盡無聲年年養子在空谷雌雄上山不  
相逐谷中近窟有山林長向村家取黃犢五陵年少  
不敢射空來林下看行迹

別離曲

行人結束出門去幾時更踏門前路憶昔君初納采  
時不言身屬遼陽戍早知今日當別離成君家計良  
爲誰男兒生身自有役那得誤我少年時不如逐君  
征戰死誰能獨老空閨裏

牧童詞

遠牧牛遶村四面禾黍稠  
陂中飢鳥啄牛背  
今我不得戲  
隴頭入陂草多牛散行  
白犢時向蘆中鳴  
隔堤吹葉應  
同伴還敲長鞭三四聲  
牛群食草莫相觸  
官家截爾頭上角

沙堤行呈裴相公

長安大道沙爲堤  
風吹無塵雨無泥  
宮中玉漏下三刻  
朱衣導騎丞相來  
路傍高樓息歌吹  
千車不行行者避  
街官問吏相傳呼  
當前十里惟空衢  
白麻詔下移相印  
新堤未成舊堤盡

求仙行

漢皇欲作飛仙子年年採藥東海裏蓬萊無路海無  
邊方士舟中相枕死招搖在天迴白日甘泉玉樹無  
仙實九皇真人終不下空向離宮祠太乙丹田有氣  
凝素華君能保之昇絳霞

古釵嘆

古釵墮井無顏色百尺泥中今復得鳳凰宛轉有古  
儀欲爲首飾不稱時女伴傳者不知主羅袖拂拭生  
光輝蘭膏已盡股半折雕文刻樣無年月雖離井底  
入匣中不用還與墜時同

◎各東西

遊人別一東復一西出門相背兩不返惟信車輪與  
馬蹄道路悠悠不知處山高海闊誰辛苦遠遊不定  
難寄書日日空尋別時語浮雲上天雨墮地暫時會  
合終離異我今與子非一身安得死生不相棄

節婦吟

君知妾有夫贈妾雙明珠感君纏綿意繫在紅羅襦  
妾家高樓連苑起良人執戟明光裏知君用心如日  
月事夫誓擬同生死還君明珠雙淚垂何不相逢未  
嫁時

讌客詞

上客不用顧金羈主人有酒君莫違請君看取園中  
花地上漸多枝上稀山頭樹影不見石溪水無風映  
更碧人人齊醉起舞時誰覺翻衣與倒幘明朝花盡  
人已去此地獨來空繞樹

永嘉行

黃頭鮮卑入洛陽胡兒持戟升明堂晉家天子作降  
虜公卿奔走如騶羊紫陌旌幡暗相觸家家雞犬驚  
上屋婦人出門隨亂兵夫死眼前不敢哭九州諸侯  
自顧土無人領兵來護主北人避胡皆在南南人至  
今能晉語



採蓮曲

秋江岸邊蓮子多採蓮女兒凭船歌青房圓實齊戢  
戢爭前競折漾微波試牽綠莖不尋藕斷處絲多刺  
傷手白練束腰袖半卷不插玉釵粧梳淺船中未滿  
度前洲借問阿誰家住遠歸時共待暮潮上自弄芙蓉  
還蕩槳

傷歌行

黃門詔下促收捕京兆尹繫御史府出門無復部曲  
隨親戚相逢不容語辭成謫慰南海州受命不得須  
臆留身着青衫騎惡馬東門之外無送者郵夫防吏

急喧鷓往往驚墮馬蹄下長安里中荒大宅朱門已  
除十二戟高堂舞榭鎖管絃美人遙望西南天

吳宮怨

吳宮四面秋江水江清露白芙蓉死吳王醉後欲更  
衣座上美人嬌不起宮中千門復萬戶君恩反復誰  
能數君心與妾旣不同徒向君前作歌舞茱萸滿宮  
紅實垂秋風嫋嫋生繁枝姑蘇臺上夕燕罷它人侍  
寢還獨歸白日在天光在地君今那得長相棄

北邙行

洛陽北門北邙道喪車麟麟入秋草車前齊唱薤露

歌高墳新起日峨峨朝朝暮暮人送葬洛陽城中人  
更多千金立碑高百尺終作誰家柱下石山頭松柏  
半無主地下白骨多於土寒食家家送紙錢烏鳶作  
窠銜上樹人居朝市未解愁請君暫向北却遊

關山月

秋月明朗關山上山中行人馬蹄響關山秋來雨雪  
多行人見月唱邊歌海邊茫茫天氣白胡兒夜度黃  
龍磧軍中探騎暮出城伏兵暗處低旌戟沙磧連天  
霜草平野駝尋水磧中鳴隴頭風急鴈不下沙場苦  
戰多流星可憐萬里關山道年年戰骨多秋草

少年行

少年從獵出長楊禁中新拜羽林郎獨到輦前射雙  
虎君王手賜黃金璫日日闔雞都市裏贏得寶刀重  
刻字百里報讐夜出城平明還在娼樓醉遙聞虜到  
平陵下不待詔書行上馬斬得名王獻桂宮封侯起  
第一日中不同六郡良家子百戰始取邊城功

白頭吟

請君膝上琴彈我白頭吟憶昔君前嬌笑語兩情宛  
轉如縈素宮中爲我起高樓更開花池種芳樹春天  
百草秋始衰棄我不待白頭時羅襦玉珥色未暗今

朝已道不相宜揚州青銅作明鏡暗中持照不見影  
人心回互自無窮眼前好惡那能定君恩已去若再  
返喜蒲花開月長滿

將軍行

彈箏峽東有胡塵天子擇日拜將軍蓬萊殿前賜六  
纛還領禁兵爲部曲當朝受詔不辭家夜向咸陽原  
上宿戰車彭彭旌旗動三十六軍齊上隴隴頭戰勝  
夜亦行分兵處處收舊城胡兒殺盡陰磧暮擾擾唯  
有牛羊聲邊人親戚曾戰沒今逐官軍收舊骨磧西  
行見萬里空幕府獨奏將軍功

賈客樂

金陵向西賈客多船中生長樂風波欲發移船近江  
口船頭祭神各澆酒停杯共說遠行期入蜀經蠻誰  
別離金多衆中爲上客夜夜筭縵眠獨遲秋江初月  
猩猩語孤帆夜發瀟湘渚水工持檝防暗灘直過山  
邊及前侶年年逐利西復東姓名不在縣籍中農夫  
稅多長辛苦棄業寧爲販寶翁

羈旅行

遠客出門行路難停車斂策在門端荒城無人霜滿  
路野火燒橋不得度寒蟲入窟鳥歸巢僮僕問我誰

家去行尋田頭暝未息雙轂長轅礙荆棘緣岡入澗  
投田家主人舂米爲夜食晨雞喔喔茆屋傍行人起  
掃車上霜舊山已別行已遠身計未成難復返長安  
陌上相識稀遙望天門白日晚誰能聽我辛苦行爲  
向君前歌一聲

車遙遙

征人遙遙出古城雙輪齊動駟馬鳴山川無處不歸  
路念君長作萬里行野田人稀秋草綠日暮放馬車  
中宿驚麇游兔在我傍獨唱鄉歌對僮僕君家大宅  
鳳城隅年年道上隨行車願爲玉鑾繫華軼終日有

聲在君側門前舊路久已拋無由復得君消息

妾薄命

薄命嫁得家子無事從軍去萬里漢家天子平四夷  
護羗都尉裹屍歸念君此行為死別對君裁縫泉下  
衣與君一日為夫婦千年萬歲亦相守君愛龍城征  
戰功妾願青樓歌樂同人生各各有所欲詎得將心  
入君腹

朱鷺

翩翩兮朱鷺來汎春塘栖綠樹羽毛如翦色如染遠  
飛欲下雙翅斂避人引子入深澗動處水紋開灑灑



誰知豪家網爾軀不如飲啄江海隅

遠別離

蓮葉團團荇葉折長江鯉魚鱗鱗赤念君少年棄親戚千里萬里獨爲客誰言遠別心不易天星墜地能爲石幾時斷得城南陌勿使居人有行役

楚宮行

章華宮中九月時桂花未落紅橘垂江頭騎火照輦道君王夜從雲夢歸霓旌鳳蓋到雙闕臺上重重歌吹發千門萬戶開相當燭籠左右列成行下輦更衣入洞房洞房侍女盡焚香玉階羅幃微有霜齊言此

夕樂未央玉酒湛湛盈華觴  
絲竹次第鳴中堂  
巴姬起舞向君王  
迴身垂手結明璫  
願君千年萬年壽  
朝出射麋夜飲酒

江南曲

江南人家多橘樹  
吳姬舟上織白苧  
土地卑濕饒蟲蛇  
連木爲牌入江住  
江村亥日長爲市  
落帆度橋來浦裏  
清莎覆城竹爲屋  
無井家家飲潮水  
長干午日沽春酒  
高高酒旗懸江口  
娼樓兩岸懸水柵  
夜唱竹枝留北客  
江南風土歡樂多  
悠悠處處盡經過

烏啼引


秦烏啼啞啞夜啼長安吏人家吏人得罪囚在獄傾  
家賣產將自贖少婦起聽夜啼烏知是官家有赦書  
下床心喜不重寐未明上堂賀舅姑少婦語啼烏汝  
啼慎勿虛借汝庭樹作高窠年年不令傷爾雛

促促詞

促促復促促家貧夫婦懼不足今年爲人送租船去  
年捕魚向江邊家中姑老子復小自執吳納輸稅錢  
家家桑麻滿地黑念君一身空努力願教牛蹄團團  
一角直君身常在應不得

宛轉行

華屋重翠幄綺席雕象床  
遠漏微更踈薄衾中夜涼  
爐氣暗徘徊寒燈背斜光  
妍姿結宵態寢覺幽夢長  
宛轉復宛轉憶君更未央



唐張司業詩集卷二

五言律詩

薊北旅思

日日望鄉國空訝白苧詞長因送人處憶得別家時  
失意還獨語多愁祇自知客亭門外柳折盡向南枝

江南春

江南楊柳春日暖地無塵渡口過新雨夜來生白蘋  
晴沙鳴乳燕芳樹醉遊人向晚青山下誰家祭水神

西樓望月

城西樓上月復是雪晴時寒夜共來望思鄉獨下遲  
幽光落水塹淨色遍霜枝明日千里去此中還別離

別鶴

雙鶴出雲谿分飛各自迷空巢在松頂折羽落江泥  
尋水終不飲逢林亦未栖別離應易老萬里兩淒淒

江陵孝女

孝女獨垂髮少年唯一身無家空托墓主祭不從人  
相吊有行客起廬因舊隣江頭聞哭處寂寂楚花春

山中古祠

春草空祠墓荒林唯鳥飛記年碑石在經亂祭人稀

野鼠緣朱帳陰塵蓋盡衣近來潭水黑時見宿龍歸

漁陽將

塞深沙草白都護領燕兵放火烧奚帳分旗築漢城  
下營看嶺勢尋雪覺人行更向桑乾北擒生問磧名  
聽夜泉

細泉深處落夜久漸聞聲獨起出門聽欲尋當澗行  
還疑隔林遠復畏有風生月下長來此無人亦到明  
送南遷客

去去遠遷客瘴中衰病身青山無限路白首不歸人  
海國戰騎象蠻州市用銀一家分幾處誰見日南春



薊北春懷

渺渺水雲外，別來音信稀。  
因逢過江使，却寄在家衣。  
問路更愁遠，逢人空說歸。  
今朝薊城北，又見塞鴻飛。

思遠人

野橋春水清，橋上送君行。  
去去人應老，年年草自生。  
出門看遠道，無信向邊城。  
楊柳別離處，秋蟬今復鳴。

贈同谿客

幽居得相近，煙景每寥寥。  
共伐臨谿樹，同爲過水橋。  
自教青鶴舞，分採紫芝苗。  
更愛南峰住，尋君路恐遙。

望行人

秋風窓下起旅鴈向南飛  
日日出門望家家行客歸  
無因見邊使空待寄寒衣  
獨倚青樓暮煙深鳥雀稀

送官人入道

舊寵昭陽裏尋仙此最稀  
名初出官籍身未稱霞衣  
已別歌舞貴長隨鸞鶴飛  
中官看入洞空駕玉輪歸

送越客

見說孤帆去東南到會稽  
春雲剡溪口殘月鏡湖西  
水鶴沙邊立山鼉竹裏啼  
謝家曾住處煙洞入應迷

贈辟穀者

學得食霞法逢人與小還  
身輕曾試鶴力弱未離山

無食犬猶在不耕牛自閑朝朝空漱水叩齒草堂間

思江南舊遊

江臯三月時花發石楠枝歸客應無數春山自不知  
獨行愁道遠迴信畏家移楊柳東西度茫茫欲問誰  
夜到漁家

漁家在江口潮水入柴扉行客欲投宿主人猶未歸  
竹深村路遠一作暗月出釣船稀遙見尋沙岸春風動

草衣

送邊使

揚旌過隴頭隴水向西流塞路依山遠戍城逢雨秋

寒沙陰漫漫疲馬去悠悠爲問征行將誰封定遠侯  
不食姑

幾年山裏住已作綠毛身護氣常稀語存思自見神  
養龜同不食留藥任生塵要問西王母仙中第幾人

古苑杏花

廢苑杏花在行人愁到時獨開新塹底半露舊燒枝  
晚色連荒轍低陰覆折碑茫茫古陵下春盡又誰知

送派人

獨向長城北黃雲暗塞天派名屬邊將舊業作公田  
擁雪添軍壘收冰當井泉知君住應老須記別鄉年

宿臨江驛

楚驛南渡口夜深來客稀  
月明見潮上江靜覺鷗飛  
旅宿今已遠此行猶未歸  
離家久無信又聽搗寒衣

送鄉客

借問炎州客天南幾日行  
江連惡谿路山遠夜郎城  
柳葉癢雲濕桂叢蠻鳥聲  
知君却迴日記得海花名

襄國別友

曉色荒城下相看秋草時  
獨遊無定計不欲道來期  
別處去家遠愁中驅馬遲  
歸人渡煙水遙映野棠枝

送遠客

南原相送處秋水草還生同作憶鄉客如今分路行  
因誰寄歸信漸遠問前程明日重陽節無人上古城  
一作秋草  
水邊生

上國贈日南僧

獨向雙峰老松門閉兩涯翻經依貝葉掛衲落藤花  
甃石新開井穿林自種茶時逢海南客蠻語問誰家  
征西將

黃沙北風起半夜又翻營戰馬雪中宿探人冰上行  
深山旗未展陰磧鼓無聲幾道征西將同收碎葉城

寄友人

憶在江南日同遊三月時採茶尋遠澗鬪鴨向春池  
送客沙頭宿招僧竹裏碁如今各千里無計得相隨

送防秋將

白首征西將猶能射戟支元戎選部曲軍吏換旌旗  
逐虜招降遠開邊舊壘移重收隴外地應似漢家時

律僧

苦行長不出清羸最少年持齋唯一食講律豈曾眠  
避草每移徑濾蟲還入泉從來天竺法到此幾人傳

山中秋一作春夜

寂寂山春一作春景靜幽人歸去一作遲橫琴當月下歷

酒及花時冷一作新露濕茆屋暗泉衝竹籬西峰採藥  
伴此夕恨無期

送南客

行路兩悠悠青山盡海頭天涯人去遠嶺北水空流  
夜市連銅柱巢居屬象州來時舊相識誰向日南遊

宿江店

野店臨西浦門前有橘花停燈待賈客賣酒與漁家  
夜靜江水白路迴山月斜閑尋泊船處潮落見平沙

嶺外逢故人

過嶺萬餘里旅遊經此稀相逢去家遠共說幾時歸



海上見花發瘴中唯鳥飛炎州望鄉伴自識北人衣

出塞

秋塞雪初下將軍遠出師分營長記火放馬不收旗  
月冷邊帷濕沙昏夜探遲征人皆白首誰見滅胡時

寄紫閣隱者

紫閣氣沉沉先生住處深有人時得見無路可相尋  
夜鹿伴茅屋秋猿守栗林唯應採靈藥更不別營心

夜宿黑竈谿

夜到碧谿裏無人秋月明逢幽更移宿取伴亦探行  
花下紅泉色雲西乳鶴聲明朝記歸處石上自書名

古樹

古樹枝柯少枯來復幾春  
露根堪繫馬空腹恐藏人  
蠹節莓苔老燒痕霹靂新  
若當江濟上行客祭為神

送徐先生歸蜀

日暮遠歸處雲間仙觀鐘  
唯持青玉牒獨立碧雞峰  
陰澗一作洞長收乳寒潭  
舊養龍幾時因賣藥得向海  
邊逢

隱者

先生已得道市井亦容身  
救病自行藥得錢多與人  
問年長不定傳法又非真  
常見鄰家一作翁說時聞一作

時使鬼神

送友人歸山

出山成北首重去結茅廬移石脩廢井掃龕盛舊書  
開田留杏樹分洞與僧居長在幽峰裏樵人見亦踈  
雲谿西亭晚望

雲水碧悠悠西亭柳岸頭夕陰生遠岫斜照逐迴流  
此地勤歸思逢人方倦遊吳興耆舊盡空見白蘋洲  
哭山中友人

天雲遙便哭山友隔今生逸墓招魂魄鐫巖記姓名  
犬因無主善鶴爲見人鳴長說能尸解多應別路行

答僧拄杖

靈藤爲拄杖白淨色如銀得自高僧手將扶病客身  
春遊不騎馬夜會亦呈人持此歸山去深宜戴角巾  
靈都觀李道士

山觀雨來靜遠房瓊草春素書天上字花洞古時人  
泥竈煮靈液掃壇朝玉真幾迴遊闌苑青節亦隨身  
送韋評事歸華陰

三峯西面住出見世人稀老大誰相識恹惶又獨歸  
掃窓秋菌落開篋夜蛾飛若向訪一作雲中伴還應着

褐衣

送閩僧

幾夏京城住今朝獨遠歸脩行四分律護淨七條衣  
谿寺黃橙熟沙田紫芋肥九龍潭上路同去客應稀  
送海客歸舊島

海上去應遠蠻家雲島孤竹船來桂府山市賣魚鬚  
入國自獻寶逢人多贈珠却歸春洞口新一作斬象祭  
天吳

登咸陽北寺樓

高秋原上寺下馬一登臨渭水西來直秦山南去深  
舊官人不住荒碣路難尋日暮涼風起蕭條多遠心

送新羅使

萬里爲朝使離家今幾年  
應知舊行路却上遠歸船  
夜泊避蛟窟朝炊求島泉  
悠悠到鄉國還望海西天

宿廣德寺寄從舅

古寺客堂空開簾四面風  
移床動栖鷓停燭聚飛蟲  
閑卧逐涼處遠愁生靜中  
林西微月色思與甯家同

宿邯鄲館寄馬磁州

孤客到空館夜寒愁卧遲  
雖沽主人酒不似在家時  
幾宿得歡笑如今成別離  
明朝行更遠迴望隔山陂

舟行寄李湖州

客愁無次第川路重辛勤藻密行舟澁灣多轉檝頻  
薄遊空感惠失計自憐貧賴誦汀洲句時時慰遠人

送閑師歸江南

徧住江南寺隨緣到上京多生脩律業外學得詩名  
講殿徧追入齋家別請行青楓鄉路遠幾日盡歸程

遊襄陽山寺

秋色江邊路煙霞若有期寺貧無利施僧老足慈悲  
薜荔侵禪室蝦蟆占浴池閑遊殊未徧即是下山時

登城寄王建

聞君鶴嶺住西望日依依遠客徧相憶登城獨不歸

十年爲道侶幾處共柴扉今日煙霞外人間得見稀  
送從弟戴玄往蘇州

楊柳閭門路悠悠水岸斜乘舟向山寺着屐到漁家  
夜月紅柑樹秋風白藕花江天詩景好迴日莫令賒  
送朱慶餘及第歸越

東南歸路遠幾日到鄉中有寺山皆遍無家水不通  
湖聲蓮葉雨野氣稻花風州縣知名久爭邀與客同  
過買島野居

青門坊外住行坐見南山此地去人遠知君終日閑  
蛙聲籬落下草色戶庭間好是經過處唯愁暮獨還



酬韓庶子

西街幽僻處正與懶相宜  
尋寺獨行遠借書常送遲  
家貧無易事身病是閑時  
寂寞誰相問祇應君自知

贈姚合少府

病來辭赤縣案上有丹經  
爲客燒茶竈教兒掃竹亭  
詩成添舊卷酒盡卧空筵  
闕下今遺逸誰瞻隱士星

送僧遊五臺兼謁李司空

遠去見雙節因行上五臺  
化樓侵曉出雪路向春開  
邊寺連烽去胡兒聽法來  
定知巡禮後解夏始應迴

送鄭秀才歸寧

桂檝彩爲衣行當令節歸夜潮迷浦遠晝雨見人稀  
野艾到時熟江鷗泊處飛離琴一奏罷山雨靄餘暉  
送李評事遊越

未習風塵事初爲吳越遊露沾湖草濕一作日照海  
山秋梅市門何在蘭亭水尚流西陵待潮處知汝不  
勝愁

閑居

東城南陌塵紫幘與朱輪盡說無多事能閑有幾人  
唯教推甲子不信守庚申誰見衡門裏終朝自在貧  
寄昭應王中丞

借得西街宅開門涓水頭長貧唯要健漸老不禁愁  
獨凭藤書案空懸竹酒鉤春風石甕寺作意共君遊

酬孫洛陽

家貧相遠住齋館入時稀獨坐看書卷閑行着褐衣  
早蟬庭筴老新雨徑莎肥各離爭各地無人見是非  
送人任濟陰

黃綬在陰下知君非旅行將書報舊里留褐與諸生  
贈別盡沽酒惜歡多出城春風濟水上候吏聽車聲  
晚春過崔駙馬東園

閑園多好風不意在街東早早詩名遠長長酒性同

竹香新雨後鶯語落花中  
莫遣經過少年光漸覺空

夏日閑居

多病逢迎少閑居  
又一年藥看辰日合茶過卯時煎  
草長晴來地蟲飛晚後天  
此時幽步遠不覺到山邊

晚秋閑居

獨坐高秋晚蕭條足遠思  
家貧長畏客身老轉憐兒  
萬種盡閑事一生能幾時  
從來踈懶性應祇有僧知

和陸司業習靜寄所知

幽室獨焚香清晨下未央  
山開登竹閣僧到出茶堂  
收拾新琴譜尋封舊藥方  
逍遙無別事不似在班行

酬韓祭酒雨中見寄

雨中愁不出陰黑盡連宵屋濕唯添漏泥深未放朝  
無荔憐馬瘦少食信兒嬌聞道韓夫子還同此寂寥  
和裴僕射移官言志

身在勤勞地常思放曠時功成歸聖主位重委群司  
看壘臺邊石閑吟篋裏詩蒼生正瞻望難與故山期  
酬白二十二舍人早春曲江見招

曲江水欲盡風日已恬和柳色看猶淺泉聲覺漸多  
紫蒲生濕岸青鴨戲新波仙掖高情客相招共一過  
酬裴僕射朝回寄韓吏部

獨愛南關裏山晴竹杪風從容朝早退蕭洒客常通  
案曲新亭上移花遠寺中唯應有吏部詩酒每相同  
春日李舍人宅見兩省諸公唱和因書情即事  
又見帝城裏東風天氣和官閑人事少年長道情多  
紫掖發章句青闈更詠謔誰知余寂寞終日斷經過

和李僕射秋日病中作

由來病根淺易見藥功成曉日杵臼靜涼風衣服輕  
猶疑少氣力漸覺有心情獨倚紅藤杖時時堦上行

早春病中

羸病及年初心情不自如多申請假牒祇送賀官書

幽徑獨行步白頭長懶梳更憐晴日色漸漸暖貧居  
送嚴大夫之桂州

旌旆過湘潭幽竒得徧探莎城百越北行路九疑南  
有地多生桂無時不養蠶聽謠難辨曲風俗自相諳

詠懷

老去多悲事非唯見二毛眼昏書字大耳重語聲高  
望月偏增思尋山覺發勞都無作官意賴得在閑曹  
使至藍谿驛寄太常王丞

獨上七盤去峰巒轉轉稠雲中迷象鼻雨裏下筆頭  
水沒荒橋路鴉啼古驛樓君今在城闕肯見此中愁

留別江陵王少府

迢迢山上路，病客獨行遲。  
况此分襟日，當君失意時。  
寒林露遠驛，晚燒獵荒陂。  
別後空迴首，相逢未有期。

贈海東僧

別家行萬里，自說過扶餘。  
學得中州語，能爲外國書。  
與醫收海藻，持呪取龍魚。  
更問同來伴，天台幾處居。

寄漢陽故人

知君漢陽住，煙樹遠重重。  
歸使雨中發，寄書燈下封。  
同時買江塢，今日別雲松。  
欲問新移處，青蘿最北峰。

送安西將



萬里海西路茫茫邊草秋計程沙塞口望伴驛峰頭  
雪暗非時宿沙深獨去愁塞鄉人易老莫住近番州

題李山人幽居

襄陽南郭外茅屋一書生無事焚香坐有時尋竹行  
畫苔藤杖細踏石筍鞋輕應笑風塵客區區逐世名  
早春閑遊

年長身多病獨宜作冷官從來閑坐慣漸覺出門難  
樹影新猶薄池光晚尚寒遙聞有花發騎馬暫行看  
贈太常王建藤杖筍鞋

蠻藤剪爲杖楚筍結成鞋稱與詩人用堪隨禮寺齋

尋花入幽徑步日下寒堦以此持相贈君應愜素懷

和周贊善聞子規

秦城啼楚鳥遠思更紛紛况是街西夜偏當雨裏聞  
應投最高樹似隔數重雲此處誰能聽遙知獨有君

送李騎曹靈州歸覲

翩翩出上京幾日到邊城漸覺風沙起還將弓箭行  
席箕侵路暗野馬見人驚軍府知歸慶應教數騎迎

寒食夜寄姚侍御

貧官多寂寞不異野人居作酒和山藥教兒寫道書  
五湖歸去遠百事病來疎况憶同懷者寒庭月上初

題清徹上人院

古寺臨壇久松間別起堂  
看添浴佛水自合讀經香  
愛養無家客多傳得効方  
遇齋長不出坐卧一繩床  
和裴司空即事通簡舊僚

肅肅上台坐四方皆仰風  
當朝奉明政早日立元功  
獨對赤墀下密宣黃閣中  
猶聞動高韻思與舊僚同  
使田留別襄陽李司空

江亭寒日晚絃筦有離聲  
從此一筵別獨爲千里行  
遲遲戀恩德役役恨公程  
迴首今新句霜雲滿楚城  
和戶部令狐尚書喜裴司空見招看雪

南園新覆雪上宰曉來看誰共登春榭唯聞有地官  
色連山遠靜氣與竹偏寒高韻更相應寧同謔吹歡

和裴司空以詩請刑部白侍郎雙鶴

皎皎仙山鶴遠留閑宅中徘徊幽謝月嘹唳小亭風  
丞相西園好池塘夜水通從君求置此賞望與賓同  
同綿州胡郎中清明日對雨西亭宴

郡內開新火高齋雨氣清惜花邀客賞勸酒促謔聲  
共醉移芳席留歡閉暮城政閑方宴語琴筑任遙情

莊陵挽謔詞

三首

白日已昭昭干戈亦漸消迎師新出道從諫早臨朝

佞倖威權薄忠良寵錫饒丘陵今一變無復白雲謠

二

觀風欲巡洛習戰且開池始改三年政旋開七月期  
陵分內外使官具吉凶儀渭北新園路蕭笳遠更悲

三

曉日龍車動秋風閭闔開行帷六宮出執紼萬方來  
慘慘郊原暮遲遲挽唱哀空山煙雨夕新栢遶陵臺

和左司元郎中秋居

十首

選得閑坊住秋來樹木肥風前卷筒簟雨裏脫荷衣  
野客留方去山童取藥歸非因入朝省過此出門稀

二

有地唯栽竹無池亦養鵝學書求墨跡釀酒愛朝和  
古鏡銘文淺神方謎語多居貧閑自樂豪客莫相過

三

閑來松菊地未省有埃塵直去多將藥朝回不訪人  
見僧收酒器迎客換紗巾更恐登清要難成自在身

四

自知清靜好不要問時豪就石安琴枕穿松厭酒槽  
山情因月甚詩語入秋高身外無餘事唯應筆硯勞

五

閑堂新掃洒稱是早秋天書客多呈帖琴僧與合絃  
莎臺乘晚上竹院就涼眠終日無忙事還應似得仙

六

醉倚斑藤杖閑眠瘦木牀案頭行氣訣爐裏降真香  
尚儉經營少居閑意思長秋茶莫夜飲新自作松漿

七

每憶舊山居新教上墨圖晚花迴地種好酒問人沽  
夜後開朝簿中前發省符爲郎凡幾歲已見白髭鬚

八

菊地纔通屐茶房不壘階憑賢者蜀藥寄信覓吳鞋

盡得仙家法多隨道客齋本無榮辱意不是學安排

九

林下無拘束閑吟放性靈好時閑藥竈高處置琴亭  
更撰居山記唯尋相鶴經初當授衣假無吏棧門鈴

十

客散高齋晚東園景象偏晴明猶有蝶涼冷漸無蟬  
籐折霜來子蝸行雨後涎新詩纔上卷已得滿城傳

經王處士原居

舊宅誰相近唯僧近竹關庭閑雲滿井窓曉雪通山  
來客半留宿借書多寄還明時未中歲莫便一生閑



不食仙姑山房

寂寂花枝裏草堂唯素琴因山曾改眼見客不言心  
月出溪路靜鶴鳴雲樹深丹砂如可學便欲住幽林

江頭

晚步隨江遠來帆過眼頻試尋新住客少見故鄉人  
回首憐歸翼長吟任此身應同南浦鴈更見嶺頭春

寄孫冲主簿公

低折滄洲簿無書整兩春馬從同事借妻怕罷官貧  
道僻收閑藥詩高笑古人仍聞長吏奏表乞鎖廳頻

贈任懶

未肯求科第深坊且隱居勝遊尋野客高卧着兵書  
點藥醫閑馬分泉灌遠蔬漢庭無得意誰擬薦相如

舊宮人

哥舞梁州女歸時白髮生全家沒蕃地無處問鄉程  
宮錦不傳樣御香空記名一身難自說愁逐路人行

春日留別

遊人欲別離醉復對花枝看却春人晚莫輕少年時  
臨行記分處回首是相思各向天涯去重來未有期

沒蕃故人

前年伐月支城上沒全師蕃漢斷消息死生長別離

無人收廢帳歸馬識殘旗欲祭疑君在天涯哭此時

唐張司業詩集卷二

唐張司業詩集卷三

五言排律

和李僕射雨中寄盧巖二給事

郊原飛雨至城闕濕雲埋  
迸點時穿牖浮漚欲上階  
偏滋解籜竹併灑落花槐  
晚潤生琴匣新涼滿藥齋  
從容朝務退放曠掖曹乖  
盡日無來客閑吟感所懷

酬李僕射晚春見寄

戟戶動初晨鶯聲雨後頻  
虛庭清氣在衆藥濕光新  
魚動芳池面苔侵老竹身  
教鋪嘗酒處自問探花人

獨此長多病幽居欲過春今朝聽高韻忽覺離埃塵  
憶盧常侍寄華山鄭隱者

獨住三峰下年深學煉丹一間松葉屋數片石花冠  
酒待山中飲琴將洞裏彈開門移遠竹剪草出幽蘭  
荒壁通泉架晴崖曬藥壇寄知騎省客長向白雲看  
和令狐尚書平泉東莊近居李僕射有寄

平地有清泉伊南古寺邊漲池閑遠屋出野偏澆田  
舊隱離多日新鄰得幾年探幽皆一絕選勝又雙全  
門靜山光別園深竹影連斜分採藥徑直過釣魚船  
雞犬還應識雲霞頓覺鮮追思應不遠賞愛諒難偏

此處堪長往遊人早共傳各當恩寄重歸卧恐無緣  
送鄭尚書出鎮南海

遠鎮承新命王程不假催班行爭路送恩賜併時來  
牙旆從城展兵符到府開響聲喧夜市海色浸潮臺  
盡角天邊月寒關嶺上梅共知公望重多是隔年迴  
徐州試反舌無聲

夏木多好鳥偏知反舌名林幽還共宿時過即無聲  
竹外天空曉谿頭雨自晴居人宜寂寞深院益淒清  
入霧暗相失當風閑易驚來年上林苑知爾最先鳴

省試行不由徑

田裏有微徑賢人不復行孰知求捷步又恐異端生  
從易衆所欲安邪患亦生誰能達大道共此竟前程  
子羽有遺跡孔門傳舊聲今逢大君子士節自光明

新城甲仗樓

謝守起新樓西臨城角頭圖功百仗麗藏器五兵脩  
結構棖薨固虛明戶檻幽魚龍卷旗幟霜雪積戈矛  
暑雨煽蒸隔涼風宴位留地高形出沒山靜氣清優  
睥睨斜光徹欄干宿靄浮芊芊稊稻色脉脉苑谿流  
郡化王丞相詩成沈隱侯居茲良得意殊勝峴山遊

贈殷山人

鬱鬱山中客知名四十年  
恓惶身獨隱寂寞性應便  
世業公侯籍生涯黍稷田  
藤懸讀書帳竹繫網魚船  
已種千頭橘新開數脉泉  
閑遊攜酒遠幽語向僧偏  
入洞題松過看花選石眠  
避喧長汨沒逢勝即留連  
自古多高跡如君少比肩  
耕耘既辛苦章句已流傳  
昔日交遊盛當時省閣賢  
同袍還共弊連轡每推先  
講序居重席群儒願執鞭  
滿堂虛左待衆目望喬遷  
才異時難用情高道自全  
畏人顏慘澹踈物勢迤邐  
違者聞知命吾生復禮玄  
深藏報恩劍久緝養生篇  
憔悴衆夫笑經過郡守憐  
夕陽悲病鶴霜氣動飢鷄



處士誰能薦窮途世所捐伯鸞甘寄食元淑苦無錢  
策蹇秋塵裏吟詩黃葉前故裘餘白領廢瑟斷朱絃  
志氣終猶在逍遙任自然家貧念婚嫁身老戀雲煙  
放逸栖巖鹿清虛飲露蟬鄭逃秦谷口嚴愛越溪邊  
霄漢予猶阻榮枯子不牽山城一相遇感激意難宣

夏日可畏

赫赫溫風扇炎炎夏日徂火威馳迥野畏景鑠遙途  
勢矯翔陽翰功分造化鑪禁城千品獨黃道一輪孤  
落照頻空簟餘暉卷夕梧如何倦遊子中路獨踟蹰

罔象得玄珠

赤水今何處遺珠已渺然離婁徒肆目罔象乃通玄  
皎潔因成性圓明不在泉暗中看夜色塵外照晴田  
無脛真難搦懷疑寶易遷今朝搜擇得應免媚晴川

和李僕射西園

遇午歸閑處西庭敞四簷高眠著瑟枕散帙檢書籀  
印在休通客山晴好捲簾竹涼蠅到少藤暗蝶爭潛  
曉一作晚鵲頻驚喜踈蟬不許拈石苔生紫點欄藥吐  
紅尖虛坐詩情遠幽探道侶兼所營尚勝地雖儉復  
誰嫌

火氣上通於心火氣上通於心

火氣上通於心火氣上通於心

火氣上通於心火氣上通於心

火氣上通於心火氣上通於心

火氣上通於心火氣上通於心

火氣上通於心火氣上通於心

火氣上通於心火氣上通於心

火氣上通於心火氣上通於心

唐張司業詩集卷四

翰林學士中書舍人張洎編輯

七言律詩

送裴相公赴鎮太原

盛德雄名遠近知，功高先乞守藩維。  
銜恩暫遣分龍節，署勅還同在鳳池。  
天子親臨樓上送，朝官齊出道邊辭。  
明年塞北清蕃落，應建生祠請立碑。

寄元員外

外郎直罷無餘事，掃洒書堂試藥爐。  
門巷不教當要路，詩篇轉覺足功夫。  
月明臺上唯僧到，夜靜坊中有

酒沽朝省入頻閑日少可能同伴舊遊無

贈梅處士

早聞聲價滿京城頭白江湖放曠情講易自傳新註  
義題詩不着舊官名近移馬跡山前住多向牛頭寺  
裏行天子如今議封禪應將束帛請先生

贈王秘書

不曾浪出謁公侯唯向花間水畔遊每着新衣看藥  
竈多收古器在書樓有官祇作山人老平地能開洞  
穴幽自領閑司了無事得來君處喜相留

謝裴司空寄馬

驟耳新駒駿得名司空遠自寄書生乍離華廐移蹄  
澁初到貧家舉眼驚每被闌人來借問多尋古寺獨  
騎行長思歲且沙堤上得從鳴珂傍火城

酬秘書王丞見寄

相看頭白來城闕却憶漳谿舊往還今體詩中偏出  
格常叅官裏每同班街西借宅多臨水馬上逢人亦  
說山芸閣水曹雖最冷與君長喜得身閑

送李餘及第後歸蜀

十年人好誦詩章今日成名出舉場歸去唯將新誥  
牒後來爭取舊衣裳山橋曉上蕉花暗水店晴看芋

草黃鄉里親情相見日一時攜酒賀高堂

早朝寄白舍人嚴郎中

鼓聲初動未聞雞羸馬街中路凍泥燭暗有時衝石  
柱雪深無處認沙堤常參班裏人猶少待漏房前月  
欲西鳳閣星郎離去遠閣門開處入還齊

書懷寄元郎中

轉覺人間無氣味常因身外省因緣經過獨愛遊山  
客計校唯求買藥錢重作學官閑盡日一離江塢病  
多年吟君釣客詞中語便欲南歸榜小船

贈僧道一作贈道士宜師

自到王城得幾年，巴童蜀馬共隨緣。  
兩朝侍從當時貴，五字聲名遠處傳。  
因住紅樓通內院，新承墨詔賜齋錢。  
閑房暫喜居相近，還得陪師坐竹邊。

書懷寄王秘書

白髮如今欲滿頭，從來百事盡應休。  
祇於觸目須防病，不擬將心更養愁。  
下藥遠求新熟酒，看山多上最高樓。  
賴君同在京城住，每到花前免獨遊。

題常郎中新亭

起得幽亭景最新，碧莎地上更無塵。  
琴書著盡猶嫌少，松竹栽多亦稱貧。  
藥酒欲開期好客，朝衣暫脫見



閑身成名同日官連署此處經過有幾人

送揚州判官

應得煙霞出俗心  
茆山道士共追尋  
閑憐鶴貌偏能畫  
暗辨桐聲自作琴  
長嘯每來松下坐  
新詩堪向雪中吟  
征南幕裏多賓客  
君獨相知最校深

喜王起侍郎放牒

東風節氣近清明  
車馬爭來滿禁城  
二十八人初上牒  
百千萬里盡傳名  
誰家不借花園看  
在處多將酒器行  
共賀春司能鑒識  
今年定合有公卿

贈王司馬

白笏朱衫年少時久登班列會朝儀貯財不省關身  
用行義唯愁被衆知藏得寶刀求主帶調成駿馬乞  
人騎未曾相識多聞說遙望長如玉樹枝

書懷

自小習成疎懶性人間事事總無功別從仙客求方  
法時到僧家問苦空老大登朝如夢裏貧窮作活似  
村中未能即便休官去慚愧南山採藥翁

贈令狐博士

頭白新年六十餘近聞生計轉空虛久爲博士誰人  
識自到長安賃舍居騎馬出隨遊寺客呼兒散寫乞

錢書古來賢哲皆如此應是才高與衆踈

送從弟剛東歸

雲水東南兩月程貪歸慶節馬蹄輕春橋欲醉攀花  
別野路閑吟觸兩行詩價已高猶失意禮司曾賞會  
成名舊山風月知應好莫過秋時不到京

贈王秘書

早在山東聲價遠曾將竒策佐嫖姚賦來詩句無閑  
語老去官班未在朝身屈祇聞詞客說家貧多見野  
僧招獨從書閣歸時晚春水渠邊看柳條

哭丘長史

曾見先皇殿上臣丹砂久服不成真常騎馬在嘶空  
櫪自作書留別故人詩句徧傳天下口朝衣徧送地  
中身最悲昨日同遊處看却春風樹樹新

一作東風  
處處春

送枝江劉明府

老着青衫為楚宰平生志業有誰知家僮從去愁行  
遠縣吏迎來恠到遲定訪玉泉幽院宿應過碧澗早  
茶時向南漸漸雲山好一路唯聞唱竹枝

送從弟徹東歸

緱山領印知公奏才稱同時盡不如奉使賀成登冊  
禮陪班看出降恩書回程去在秋塵裏受詔辭歸曉

漏初早晚得爲朝署拜閑坊買宅作隣居

哭胡十八遇

早得聲名年尚少尋常志氣出風塵  
文場繼續成三代家族輝華在一身  
幼子見生才滿月選書知寫未  
呈人送君帳下衣裳白數尺墳頭柏樹新

贈賈島

籬落荒涼僮僕飢樂遊原上住多時  
蹇驢放飽騎將出秋卷裝成寄與誰  
拄杖傍田尋野菜封書乞米趁  
時炊姓名未上登科記身屈惟應內史知

逢王建有贈

年狀皆齊初有髭鵲山漳水每追隨使君座下朝聽  
易處士庭中夜會詩新作句成相借問開求義盡共  
尋思經今三十餘年事却說還同昨日時

移居靜安坊答元八郎中

長安寺裡多時住雖守卑官不厭貧作活每常嫌費  
力移居祇是貴容身初開井淺偏宜樹漸覺街閑省  
踏塵更喜往還相去近門前減却送書人

送楊少尹赴鳳翔

詩名往日動長安首首人家卷裏看西學已行秦博  
士南宮新拜漢郎官得錢祇了還書鋪借宅常時事

藥欄今去岐州生計薄移居偏近隴頭寒

送韓侍御歸山

聞君久卧在雲間為佐嫖姚未得還  
新結茆廬招隱逸獨騎驄馬入深山  
九靈洞口行應到五粒松枝醉亦攀  
明日河聲出城去家僮不復掃柴關

新除水曹郎答白舍人見賀

年過五十到南宮章句無名荷至公  
黃紙開呈相府後朱衣引入謝班中  
諸曹縱許為仙侶群吏多嫌是老翁  
最幸紫薇郎見愛獨稱官與古人同

送楊少尹赴蒲城

官爲本府當身榮因得還鄉任野情自廢田園今作  
主每逢耆老不呼名舊遊寺裏僧應識新別橋邊樹  
已成公事况閑詩更好將隨相逐上山行

哭元九少府

平生志業獨相知早結雲山老去期初作學官常共  
宿晚登朝列暫同時閑來各數經過地醉後齊吟唱  
和詩今日春風花滿宅入門行哭見靈帷

送侯判官赴廣州從軍

年少才高求自展將身萬里赴軍門辟書遠到開呈  
客公服新成着謝恩驛舫過江分白候戍亭當嶺見



紅旛海花蠻草連冬有行處無家不滿園

答白杭州郡樓登望盡圖見寄

盡得江城登望處寄來今日到長安乍驚物色從詩  
出更想工人下手難將展書堂偏覺好每來朝客盡  
求看見君向此閑吟意肯恨當時作外官

贈趙將事

當年膽略已縱橫每見妖星氣不平身貴早登龍尾  
道功高自破鹿頭城尋常得對論邊事委曲承恩掌  
內兵會取安西將報國凌烟閣上大書名

送和蕃公主

塞上如今無戰塵漢家公主出和親  
邑司猶屬宗卿寺冊號還同虜  
帳人九姓旗幡先引路一生衣服盡  
隨身羶城南望無迴日空見沙蓬水柳春

寒食內宴

二首

朝光瑞氣滿宮樓綵繡魚龍四面稠  
廊下御厨分冷食殿前香騎逐飛毬  
千官盡醉猶教坐百戲皆呈未放休  
共喜拜恩侵夜出金吾不敢問行由

城闕沈沈向曉寒恩當令節賜餘歡  
瑞煙深處闌三殿香雨微時引百官  
寶樹樓前分繡幙綵花廊下映華欄  
宮筵戲樂年年別已得三迴對御看

朝日勅賜櫻桃

仙果人間都未有，今朝忽見下天門。  
捧盤小吏初宣勅，當殿群臣共拜恩。  
日色遙分廊下座，露香才出禁中園。  
每年重此長先熟，願得千春奉至尊。

太白老人

日觀東峰幽客住，竹巾藤帶亦逢迎。  
暗脩黃籙無人見，深種胡麻共犬行。  
洞裏仙家常獨往，壺中靈藥自爲名。  
春泉四面遠茅屋，日日唯聞杵臼聲。

和裴司空酬滿城楊少尹

聖朝偏重大司空，人詠元和第一功。  
擁節高臨襄水

上題詩遠入漢城中共驚向老多年別更憶登科舊  
日同誰不望歸丞相府江邊楊柳又秋風

寄和州劉使君

別離已久猶爲郡閑向春風倒酒餅送客將過沙口  
堰看花多上水心亭曉來江氣連城白雨後山光滿  
郭青到此詩情應更遠醉中高詠有誰聽

贈商州王使君

銜命南來會郡堂却思朝裏接班行才雄猶是山城  
守道薄初爲水部郎選勝相留開客館尋幽更引到  
僧房明朝從此辭君去獨出商關路漸長

寄令狐賓客

勲名盡得國家傳，退押琴僧與酒仙。  
還帶郡符經幾處，暫辭台座已三年。  
留司未到龍樓下，拜表長懷玉案前。  
秋日出城伊水好，領誰相逐上閑船。

寄梅處士

擾擾人間是與非，官閑自覺省心機。  
六行班裏身常下，九列符中事亦稀。  
市客慣曾賒賤藥，家童驚見着新衣。  
君今獨得居山樂，應笑多時未辦歸。

送施肩吾東歸

知君本是烟霞客，被薦因來城闕間。  
世業偏臨七里

瀨仙遊多在四明山早聞詩句傳人徧  
新得科名到處閑惆悵灞亭相送去雲中  
琪樹不同攀

崑崙兒

崑崙家住海中州蠻客將來漢地遊  
言語解教秦吉了波濤初過鬱林洲  
金環欲落曾穿耳螺髻長拳不裹頭  
自愛肌膚黑如漆行時半脫木綿裘

贈李杭州

仙郎白首未歸朝應爲蒼生領六條  
惠化州人盡清淨高情野鶴共逍遙  
竹間虛館無朝訟山畔青田長夏苗  
終日政聲長獨坐開門唯望浙江潮

送鄭尚書赴廣州

聖朝選將持符節，內制宣時百辟聽。  
海北蠻夷來舞，蹈嶺南封管送圖經。  
白鵬飛達迎官舫，紅槿開當燕客亭。  
此處莫言多瘴癘，天邊看取老人星。

賀秘書王丞南郊攝將軍

正初天子親郊禮，詔攝將軍領衛兵。  
斜帶銀刀入黃道，先隨玉輅到青城。  
壇邊不在千官位，仗外唯聞再拜聲。  
共喜與君逢此日，病中無計得隨行。

送令狐尚書赴東都留守

朝廷重寄在關東，共說從來選上公。  
勳業新成大梁

鎮恩榮更守洛陽宮行香暫出天橋上巡禮常過禁  
殿中每領群臣拜重慶半開門仗日曛曛

拜豐陵

順宗

歲朝園寢遣公卿學省班中亦攝行身逐陵宮齊再  
拜手持木鐸叩三聲寒更報點來山殿曉炬分行照  
栢城却下龍門看漸遠金峰高處日微明

贈孔尚書

能將直道歷榮班事著元和實錄間三表自陳辭比  
闕一家相送入南山買來侍女教人嫁賜得朝衣在



篔簹閣宅近青山高靜處時歸林下暫開關

酬杭州白使君兼寄浙東元大夫

相印暫離臨遠鎮掖垣出守復同時一行已作三年  
別兩處空傳七字詩越地江山應共見秦天風月不  
相知人間聚散真難料莫歎平生信所之

寄蘇州白二十三使君

三朝出入紫微臣頭白金章未在身登第早年同座  
主題詩今日異州人閭門柳色煙中遠茂苑鶯聲雨  
後新此處吟詩向山寺知君忘却曲江春

送白賓客分司東都

赫赫聲名三十春，高情人獨出埃塵。  
病辭省闕歸閑處，恩許官曹作上賓。  
詩裏難同相得伴，酒邊多見自由身。  
老人也擬休官去，便是君家池上人。

贈閻少保

辭榮戀闕未還鄉，脩養年多氣力强。  
半俸歸燒伏火樂，全家解說養生方。  
特承恩詔新開戟，每見公卿不下牀。  
竹樹清深寒院靜，長懸石磬在虛廊。

贈別王侍御赴任陝州司馬

京城在處閑人少，唯共君行並馬蹄。  
更和詩篇名最出，時傾盃酒興常齊。  
同趨闕下聽鐘漏，獨向軍前聞鼓輦。  
今日春明門外別，更無因得到街西。

田司空入朝

西來將相位，兼雄不與諸君覲。  
禮同早變山東知，順命新收濟上立。  
殊功朝官敘謁趨，門外恩使宣迎滿路中。  
閭闔曉來銅漏靜，身當受冊大明宮。

送浙西周判官

由來自是煙霞客，早已聞名詩酒間。  
天闕因將賀表

到家鄉新著賜衣還常吟卷裏相酬句自話湖邊舊  
住山吳越主人偏愛重多應不肯放君閑

送吳鍊師歸王屋

王陽峰下學長生洞府仙鄉已有名獨戴熊鬚冠暫  
出唯將鶴尾扇同行煉成雲母休炊爨召得雷公當  
吏兵却到瑤壇上頭宿應聞空裏步虛聲

送邵州林使君

詞客南行寵命新瀟湘郡入曲江津山幽自足探微  
處俗朴應無爭競人郭外相連排殿閣市中多半用  
金銀知君不作家私計遷日還同到日貧

寄王六侍御

漸覺近來筋力少，難堪今日在風塵。  
誰能借問功名事，祇自扶持老病身。  
積得藥資將助道，肯嫌家計不如人。  
洞庭已置新居宅，歸去期君與作鄰。

送稽亭山寺僧

師住稽亭高處寺，斜廊曲閣倚雲開。  
山門十里松間入，泉澗三重洞裏來。  
名岳尋遊今已徧，家城禮謁便應迴。  
舊房到日閑吟後，林下還登說法臺。

送汀州元使君

曾成趙北歸朝計，因拜王門最好官。  
爲郡暫辭雙鳳

闕全家遠過九龍灘山鄉祇有輸蕉戶水鎮應多養  
鴨欄地僻尋常來客少刺桐花發共誰看

寄孫洛陽格

久持刑憲聲名遠好是中朝正直臣赤縣上來應足  
事青衫老去未離身常思從省連歸馬乍覺同班少  
舊人遙愛南橋秋日晚雨邊楊柳映天津

胡山人歸王屋因有贈

轉轉無成到白頭人間舉眼盡堪愁此生已是蹉跎  
去每事終從鹵莽休雖作閑官少拘束難逢勝景可  
淹留君歸與訪移家處若箇峰前最較幽

寄處州韓使君

南康太守負才豪五十如今未擁旄  
早得一人知姓字常聞三事說功勞  
月明渡口漳江靜雲散城頭巖石高  
郡政已成秋思遠閑吟應不問官曹

送從弟濛赴饒州

京城南去鄱陽遠風月悠悠別思勞  
三領郡符新寄重再登科第舊名高  
去程江上多看埃迎吏船中亦帶刀  
到日更行清靜化春天應不見蓬蒿

羅道士

城裏無人得實年衣襟常帶臭黃煙  
樓中賒酒唯留

藥洞裏爭棋不睹錢聞客語聲知貴賤持花歌詠似  
狂顛尋常行處頻逢見世上多疑是謫仙

寄陸渾趙明府

與君學省同官處常日相隨說道情新作陸渾山縣  
長早知三禮甲科名郭中時有仙人住城內應多藥  
草生公事稀踈來客少無妨着屐獨閑行

同蔣韋二少監贈李郎中

舊年同是此曹郎各罷魚符自楚鄉重着青衫承認  
命齊趨紫殿異班行別來同說經過事老去相傳補  
養方憶得當時亦連步如今獨在讀書堂



贈王侍御

心同野鶴與塵遠詩似冰壺見底清  
府縣同趨昨日事升沉不改故人情  
上陽春晚蕭蕭雨洛水寒來夜  
夜聲自歎獨爲折腰吏可憐  
驄馬路傍行

送金少卿副使歸新羅

雲島茫茫天半微向東  
萬里一帆飛久爲侍子承恩  
重今佐使臣銜命歸過海  
便應將國信到鄉猶自着  
朝衣從前此去人無數  
光彩如君定是希

送李司空赴鎮襄陽

中外兼權社稷臣  
千官齊出拜行塵  
再調公鼎勳庸

盛三受兵符寵命新商路雪明旗旆遠楚堤梅發驛  
亭春襄陽風景由來好重與江山作主人

送李僕射赴鎮鳳翔

由來勲業屬英雄兄弟連榮列位同先入賊城擒首  
惡盡封官庫讓元公旌幢獨繼家聲外竹帛新添國  
史中天子欲收秦隴地故教移鎮在扶風

寄白二十二舍人

早知內詔過先輦蹭蹬江南百事踈溢浦城中爲上  
佐爐峰寺後着幽居偏依仙法多求藥長共僧遊不  
讀書三省比來名望重肯容君去樂樵漁

唐張司業詩集卷四

東中天子於外... 雲樹... 山... 風... 雲... 山... 入

唐張司業詩集卷五

五言絕句

和韋開州居出十二首

宿雲亭

清淨當深處  
虛明向遠關  
卷簾無俗客  
應只見雲來

梅溪

自愛新梅好  
行尋一徑斜  
不教人掃石  
恐損落來花

茶嶺

紫芽連白蘂  
初向嶺頭生  
自看家人摘  
尋常觸露行

流杯渠

涿酒白螺杯隨流去復回似知人把處各向面前來

盤石磴

壘石連空遠層層勢更危不知行幾匝得到上頭時

桃塢

春塢桃花發多將野客遊日西殊未散省望酒缸頭

竹巖

獨入千竿裏緣巖踏石層筍頭齊欲出更不許人登

琵琶臺

臺上綠羅春閑登不待人每當休暇日着屐戴綸巾

胡蘆沼

曲沼春流滿新蒲映野鷓間齋朝飯後拄杖遠行多

隱月岫

月出深峰裏清光夏亦寒每嫌西落疾不得到明看

繡衣石榻

山城無別味藥菜兼魚果時引繡衣人同來石上坐

上士泉餅

堦上一眼泉四邊青石甃唯有護淨僧添餅將盥漱

送遠客

憔悴遠行客殷勤欲別杯九星壇下路幾日見重來

寄西峰僧

松暗水涓涓夜涼人未眠西峰月猶在遙憶草堂前

禪師

獨在西峰頂年年閉石房定中無弟子人到爲焚香  
惜花

山中春已晚處處見花稀明日來應盡林間宿不歸  
題暉師影堂

日早欲參禪竟無相識緣道場今獨到惆悵影堂前  
涇州塞

行道涇州塞唯聞羌戍聲道邊古雙堠猶記向安西

野田

漠漠野田草草中牛羊道古墓無子孫白楊不得老

岸花

可憐岸邊樹紅藍發青條東風吹渡水衝着木蘭橈



唐張司業詩集卷五

唐張司業詩集卷六

七言絕句

送蜀客

蜀客南行祭碧雞  
木綿花發錦江西  
山橋日晚行人少  
時見猩猩樹上啼

送元結

昔日同遊漳水邊  
如今重說恨綿綿  
天涯相見還離別  
客路秋風又幾年

官山祠

秋草宮人斜裏墓宮人誰送葬來時千千萬萬皆如  
此家在邊城亦不知

美人宮碁

紅燭臺前出翠娥海沙鋪局巧相和趁行移手巡收  
盡數數看誰得最多

蠻州

瘴水蠻中入洞流人家多住竹棚頭一山海上無城  
郭唯見松牌記象州

送元宗簡

貂帽垂肩窄皂裘雪深騎馬向西州暫時相見還相

送却閉閑門依舊愁

寄徐晦

鄂陂魚美酒偏濃不出琴齋見雪峰  
應勝昨來趨府日薄書林上亂重重

寄白學士

自掌天書見客稀縱因休沐鎖雙扉  
幾迴扶病欲相訪知向禁中歸未歸

喜王六同宿

十八年來恨別離唯同一宿詠新詩  
更相借問詩中語共說如今勝舊時

題玉像堂

玉毫不着世間塵輝相分明十八身入夜無煙燈更  
好堂中唯有轉經人

與賈島閑遊

水北原南草色新雪消風暖不生塵城中車馬應無  
數解得閑行有幾人

哭丘長史

丘公已歿故人稀欲過街西更訪誰每到子城東路  
上憶君相逐入朝時

哭孟寂

一作哭孟郊

曲江院裏題名處十九人中最少年今日春光吟不  
見杏花零落寺門前

患眼

三年患眼今年校免與風光便隔生昨日韓家後園  
裏看花猶似未分明

答劉競

劉君久被時拋擲老向城中作選人昨日街西相近  
住每來存問老夫身

贈華嚴院僧

一身依止荒閑院燭耀窓中有宿煙徧禮華嚴經裏

字不曾行到寺門前

逢故人

山東一十餘年別今日相逢在上都說盡向來無限  
事相看盡是白髭鬚

送蕭遠弟

街北槐花傍馬垂病身相送出門遲與君別後秋風  
夜作得新詩說向誰

送辛少府任安縣

才多不肯浪容身老大詩章轉更新選得天台山下  
住一家全作學仙人

贈任道人

長安多病無生計  
藥鋪醫人亂索錢  
欲得定知身上事  
憑君爲筭小行年

招周居士

閉門秋雨濕墻茨  
俗客來稀野思多  
已掃書齋安藥竈  
山人作意早經過

送許處士

高情自與俗人疎  
獨向藍谿僻處居  
會到白雲長取醉  
不能窓下讀閑書

送律師歸婺州



京中開講已多時，曾作壇頭證戒師。  
歸到雙溪橋北寺，鄉僧爭就學威儀。

題楊秘書新居

愛閑不向爭名地，宅在街西最靜坊。  
卷裏詩過一千首，白頭新受秘書郎。

送睦師

九星臺下煎茶別，五老峰頭覓寺居。  
作得新詩旋相寄，人來請莫達空書。

送僧往全州

聞道谿陰山水好，師行一一徧經過。  
事須覓取堪居

處若箇谿頭藥最多

尋徐道士

尋師遠到暉天觀竹院森森閉藥房  
聞入靜來經七日仙童簷下獨焚香

答開州韋使君寄車前子

開州午日車前子作藥人皆道有神  
慙愧使君憐病眼二千里外寄閑人

憶故州

累石爲山伴野夫自收靈藥讀仙書  
如今身是他州客每見青山憶舊居

送客遊蜀

行盡青山到益州錦城樓下三江流杜家曾向此中  
住爲到浣花谿水頭

送陸暢

共踏長安街裏塵吳州獨作未歸身昔年舊宅今誰  
住君過西塘與問人

感春

遠客悠悠任病身謝家池上又逢春明年各自東西  
去此地看花是別人

贈李司議

漢庭誰問後荒客十載天南着白衣秋草茫茫惡谿  
路嶺頭還送北人歸

別客

青山歷歷水悠悠今日相逢明日秋繫馬城邊楊柳  
樹爲君沽酒暫淹留

登樓寄胡家兄弟

獨上西樓盡日閑林煙演漾鳥綿蠻謝家兄弟重城  
裏不得同看雨後山

答劉明府

身病多時又客居滿城親舊久相踈可憐絳縣劉明

府獨解頻頻寄遠書

酬藤杖

病裏出門行步遲  
喜君相贈古藤枝  
倚來自覺身生力  
每向傍人說得時

法雄寺東樓

汾陽舊宅今爲寺  
猶有當時歌舞樓  
四十年來車馬絕  
古槐深巷暮蟬愁

寄故人

靜曲閑房病客居  
蟬聲滿樹槿花疎  
故人祇在藍田縣  
強半年來未得書

鄰婦哭征夫

雙鬢初合便分離萬里征夫不得隨今日軍回身獨  
歿去時鞍馬別人騎

和崔駙馬聞蟬

鳳凰樓下多歡樂不覺秋風暮雨天應爲昨來身暫  
病蟬聲得到耳傍邊

和裴僕射看櫻桃花

昨日南園新雨後櫻桃花發舊枝柯天明不待人同  
看遶樹重重履跡多

和長安郭明府與友人縣中會飲

一罇清酒兩人同好在街西水縣中自恨病身相去  
遠此時閑坐對秋風

唐昌觀看花

一作興唐

新紅舊紫不相宜看覺從前兩月遲更向同來詩客  
道明年到此莫過時

九華觀看花

街西無數閑遊處不似九華仙觀中花裏可憐池上  
景幾重墻壁貯春風

贈姚合

丹鳳城門向曉開千官相次入朝來唯君獨走衝塵

土下馬橋邊報直廻

同常員外開元觀尋時道士

觀裏初晴竹樹涼  
閑行共到最高房  
昨來官罷無生計  
欲就師求斷穀方

同韓侍御南谿夜賞

喜作閑人得出城  
南谿兩月逐君行  
忽聞新命須歸去  
一夜船中語到明

使行望悟真寺

採玉峰連佛寺幽  
高高斜對驛門樓  
無端來去騎官馬  
寸步教身不得遊



重陽日至峽道

無限青山行已盡  
迴看忽覺遠離家  
逢高欲飲重陽酒  
山菊今朝未有花

贈主客劉郎中

憶昔君登南省日  
老夫猶是褐衣身  
誰知二十餘年後  
來作客曹相替人

同嚴給事聞唐昌觀玉藥近有仙過作二首

千枝花裏玉塵飛  
阿母宮中見亦稀  
應共諸仙闔百草  
獨來偷折一枝歸

九色雲中紫鳳車  
尋仙來到洞仙家  
飛輪迴處無踪

跡唯有班班滿地花

秋思

洛陽城裏見秋風欲作歸書意萬重復恐匆匆說不  
盡行人臨發又開封

憶遠

行人猶未有歸期萬里初程日暮時唯愛門前雙柳  
樹枝枝葉葉不相離

玉仙館

長谿新雨色如泥野水陰雲盡向西楚客天南行漸  
遠山山樹裏鷓鴣啼

寄府吏

野外尋花共作期，今朝出郭不相隨。  
待君公事有閑日，此地春光應過時。

張蕭遠雪夜同宿

數卷新遊蜀地詩，長安僻巷得相隨。  
草堂雪夜攜琴宿，說似青城館裏時。

涼州詞

三首

邊城暮雨鴈飛低，蘆筍初生漸欲齊。  
無數鈴聲遙過磧，應馱白練到安西。

鳳林關裏水東流，白草黃榆六十秋。  
邊將皆承主恩

澤無人解道取涼州  
古鎮城門白磧開  
胡兵往往傍沙堆  
巡邊使客行應  
早欲問平安無使來

宮詞二首

新鷹初放兔猶肥  
白日君王在內稀  
薄暮千門臨欲  
鎖紅粧飛騎向前歸

華清宮

溫泉流入漢離宮  
宮樹行行浴殿空  
武帝時人今欲  
盡青山空閉御墻中

崔駙馬養鶴

身閑無事稱高情，已有人間章句名。  
求得鶴來教翦翅，望仙臺下亦將行。

閑遊

老身不計人間事，野寺秋晴每獨過。  
病眼校來猶斷酒，却嫌行處菊花多。

劉兵曹贈酒

一餅顏色似秋泉，開向新栽小竹前。  
飲罷身中更無事，移床獨就夕陽眠。

送梧州王使君

楚江亭上秋風起，看發蒼梧太守船。  
千里同行從此

別相逢又隔幾年

春日早朝

曉陌春寒朝騎來  
瑞雲深處見樓臺  
夜來新雨沙堤濕  
東上閣門應未開

寄朱闕二山人

爲箇朝章束此身  
眼看東路去無因  
歷陽舊客今應少  
轉憶鄰家二老人

寄李渤

五度谿頭躑躅紅  
嵩陽寺裏講時鍾  
春山處處行應好  
一月看花到幾峰

尋仙

谿頭一徑入青崖  
處處仙居隔杏花  
更見峰西幽客  
說雲中猶有兩三家

同白侍郎杏園贈劉郎中

一去瀟湘頭已白  
今朝始見杏花春  
從來遷客應無  
數重到花前有幾人

答鄱陽客藥名詩

江臯歲暮相逢地  
黃葉霜前半夏枝  
子夜吟詩向松  
桂心中萬事喜君知

寄宋景

詔發官兵取亂臣將軍弓箭不離身君今獨在征東  
府莫遺功名屬別人

寄王奉御

愛君紫閣峰前好新作書堂藥竈成見欲移居相近  
住有田多與種黃精

題涓北寺上人

昔祭郊壇今謁陵寺中高處復來登十餘年後人多  
別喜見當時轉讀僧

閑遊

終日不離塵土間若爲能見此身閑今朝暫共遊僧



語更恨多時別舊山

◎倡女詞

輕鬢叢梳潤掃眉爲憊風日下樓稀畫羅金縷難相  
稱故着尋常淡薄衣

答元八遺紗帽

黑紗方帽君邊得稱對山前坐竹牀唯恐被人偷樣  
剪不曾閑戴出書堂

題僧院

聞師行講青龍院本寺往來多少年靜掃空房唯獨  
坐千莖秋竹在簷前

送元八

百神齋祭相隨徧尋水看山亦共行  
明日城西送君去舊遊重到獨題名

吳楚歌詞

庭前春鳥啄林聲紅夾羅襦縫未成  
今朝社日停針線起向朱櫻樹下行

題方睦上人月臺觀

一身清淨無童子獨坐空堂得幾年  
每夜焚香通月觀可憐光影最團圓

華山廟

金天廟下西京道巫女紛紛走似煙手把紙錢迎過  
客遣求恩福到神前

病中酬元宗簡

東風漸暖滿城春獨向深房養病身莫說櫻桃花已  
發今年不作看花人

寺宿齋

晚到金光門外寺寺中新竹隔簾多齋官禁與僧相  
見院院開門不得過

贈施肩吾

世間漸覺無多事雖得空名未着身合取藥成相待

喫不須先作上天人

贈王建

自君去後交遊少東野亡來篋笥貧  
賴有白頭王建在眼前猶見詠詩人

逢賈島

僧房逢着欵冬花出寺行吟日已斜  
十二街中春雪遍馬蹄今去入誰家

楚妃怨

梧桐葉下黃金井橫架轆轤牽素綆  
美人初起天未明手拂銀瓶秋水冷

離宮怨

高堂別館連湘渚長向春光開萬戶荆王去去不復  
來宮中美人自歌舞

成都曲

錦江近西烟水綠新雨山頭荔枝熟萬里橋邊多酒  
家遊人愛向誰家宿

寒塘曲

寒塘沉沉柳葉疎水暗人語驚棲鳥舟中少年醉不  
起持燭照水射遊魚

春別曲

長江春水綠堪染蓮葉出水大如錢江頭橘樹君自種那不长繫木蘭船

臺城

臺城六代競豪華結綺臨春事最奢萬戶千門成野草只緣一曲後庭花

春詞

新粧面面下朱樓深鎖春光一院愁行到中庭數花朵蜻蜓飛上玉搔頭

浪淘沙詞

鸚鵡洲頭浪颭沙青樓春望日將斜啣泥燕子爭歸

舍獨自狂夫不憶家

傷愚溪 二首

柳門竹巷依依在野草青苔日日多縱有鄰人解吹  
笛山陽舊侶更誰過

溪水悠悠春自來草堂無主燕飛回隔簾唯見中庭  
草一樹山榴依舊開

聽舊宮人穆氏唱歌

曾隨織女渡天河記得雲間第一歌休唱貞元供奉  
曲當時朝士已無多

楊柳枝詞 二首

煬帝行宮汴水濱  
數株殘柳不勝春  
晚來風起花如雪  
飛入宮牆不見人

城外春風吹酒旗  
行人揮袂日西時  
長安陌上無窮樹  
唯有垂楊管別離

宿都庭有懷

雷雨湘江起卧龍  
武陵樵客躡仙蹤  
十年楚水楓林下  
今夜初聞長樂鍾

無題

桃蹊柳陌好經過  
燈下粧成月下歌  
爲是襄王故宮地  
至今猶有細腰多



堤上行

二首

酒旗相望大堤頭，堤下連橋堤上樓。  
日暮行人爭渡急，槳聲幽軋滿中流。

江南江北望烟波，入夜行人相應歌。  
桃葉傳情竹枝怨，水流無限月明多。

竹枝詞

五首

白帝城頭春草生，白鹽山下蜀江清。  
南人上來歌一曲，北上莫人動鄉情。

日出三竿春霧銷，江頭蜀客駐蘭橈。  
憑寄狂夫書一紙，家住成都萬里橋。

瞿唐嘈嘈十二灘此中道路古來難  
長恨人心不如水等閒平地起波瀾  
山上層層桃李花雲間烟火是人家  
銀釧金釵來負水長刀短笠去留賒  
楊柳青青江水平聞郎江上唱歌聲  
東邊日出西邊雨道是無情還有情

楊柳送客

青楓江畔白蘋洲楚客傷離不待秋  
君見隋朝更何事綠楊南渡水悠悠

送客還幽州

惆悵秦城送獨歸  
薊門雲樹遠依依  
秋來莫射南飛鴈  
從遣乘春更北飛

揚州送客

南行直入鷓鴣群  
萬歲橋邊一送君  
聞道望鄉聽不得  
梅花暗落嶺頭雲

隋宮燕

燕語如傷舊國春  
宮花零落旋成塵  
自從門閉春光後  
幾度飛來不見人

山禽

山禽毛如白練帶  
栖我庭前粟樹枝  
獼猴半夜來取

栗一雙中林向月飛

秋山

秋山無雲復無風溪頭看月出深松草堂不閉石床  
靜葉間墜露聲重重

玉真觀

臺殿曾爲貴主家春風吹盡竹窓紗院中仙女脩香  
火不許閑人入看花

蠻中

銅柱南邊毒草春行人幾日到金麟玉鐸穿耳誰家  
女自抱琵琶迎海神

贈道士

茆山近別剡谿逢玉節青旄十二重  
自說年年上天去羅浮最近海邊峰

重平驛作

茫茫菰草平如地渺渺長堤曲似城  
日暮未知投宿處逢人更問向前程

宿天竺寺寄盧隱寺僧

夜向靈谿息此身風泉竹露淨衣塵  
月明石上堪同宿那作山南山北人

唐張司業詩集卷六

唐張司業詩集卷七拾遺

樂府三十三首

隴頭行

隴頭路斷人不行胡騎已入涼州城漢兵處處格鬪  
死一朝盡沒隴西地驅我邊人胡中去恣放牛羊食  
禾黍去年中國養子孫今着氍毹學胡語誰能還使  
李輕車重取涼州屬漢家

廢宅行

胡馬崩騰滿阡陌都人避亂唯空宅宅邊青桑垂宛  
宛野蠶食葉還成繭黃雀啣草入燕窠嘖嘖啾啾白

日晚去時禾黍埋地中饑兵掘土翻重重鴟梟養子  
庭樹上曲墻空屋屋一作室多旋風亂定幾人還本土唯  
有官家重作主

秋夜長

秋天如水夜未央天漢東西月色光愁人不寐畏枕  
席暗虫嘖嘖遶我傍荒城爲村無更聲起看北斗天  
未明白露滿田風裊裊千聲萬聲鴟鳥鳴

塞上曲

邊州八月修城堡候騎先燒磧上草胡風吹沙度隴  
飛隴頭林木無北枝將軍閱兵青塞下鳴鼓繫繫促

獵圍天寒山路石斷裂白日不銷帳上雪烏孫國亂  
多降胡詔使名王持漢節年年征戰不得閒邊人殺  
盡唯空山

董逃行

洛陽城頭火曈曈亂兵燒我天子宮宮城南面有深  
山盡將老幼藏其間重巖爲屋椽爲食丁男夜行候  
消息聞道官軍猶掠人舊里如今歸未得董逃行漢  
家幾時重太平

江村行

南塘水深蘆筍齊下田種稻不作畦耕場磷磷在水



底短衣半染蘆中泥田頭刈莎結爲屋歸來繫牛還  
獨宿水淹手足盡爲瘡山重遶衣飛撲撲桑村堪黑  
蠶再眠小姑採桑不餉田江南熱旱天氣毒雨中移  
秧顏色鮮一年耕種長苦辛田熟家家將賽神

湘江曲

湘江無潮秋水濶湘中月落行人發行人發送人歸  
白蘋茫茫鷓鴣飛

白蠶吟

天欲雨有東風南溪白蠶鳴窟中六月人家井無水  
夜聞蠶聲人盡起

樵客吟

山上採樵選枯樹深處樵多出辛苦秋來野火燒櫟  
林枝柯已枯堪採取斧聲坎坎在幽谷採得齊稍青  
葛東日西待伴同下山竹擔彎彎向身曲共知路傍  
多虎穴未出深林不敢歇村西地暗狐兔行稚子叫  
時相應聲採樵客莫採松與栢松栢生枝直且堅與  
君作屋成家宅

春江曲

春江無水潮水平蒲心出水鳧鷖鳴長干夫婿愛遠  
行自染春衣縫已成妾身長金陵側去年夫婿住

江北春來未到父母家舟小風多渡不得欲辭舅姑  
先問人私向江頭祭鬼神

烏棲曲

西山作宮花滿池宮烏曉鳴茱萸枝吳姬採蓮自唱  
曲君王昨夜船中宿

短歌行

青天蕩蕩高且虛上有白日無根株流光斃出還入  
地使我少年不須臾與君相逢勿寂寞衰老不復如  
今樂金卮盛酒置君前再拜勸君千萬年

泗水行

泗水流急石纂纂鯉魚上下紅尾短春冰消散日華  
滿行舟往來浮橋斷城邊漁市人早行水烟漠漠多  
棹聲

雲童行

雲童童白龍之尾垂江中今年天旱不作雨水足墻  
上有禾黍

長塘湖

長塘湖一斛水中半斛魚大魚如柳葉小魚如針鋒  
水濁誰能辨真龍

雀飛多

雀飛多觸網羅網羅高樹顛汝飛蓬蒿下勿復投身  
網羅間粟積倉禾在田巢之鷓望其母來還

寄葛蒲

石上生葛蒲一寸十二節仙人勸我食令我頭青面  
如雪逢人寄君一絳囊書中不得傳此方君能來作  
棲霞侶與君同入丹玄鄉

山頭鹿

山頭鹿雙角芟芟尾促促貧兒多租輸不足夫死未  
葬兒在獄旱日熬熬烝野岡禾黍不熟無獄糧縣家  
惟憂少軍食誰能令爾無死傷

憶遠曲

水上山沉沉征途復繞林途荒人行少馬迹猶可尋  
雪中獨立樹海口失侶禽離憂如長線千里縈我心

春堤曲

野塘鳩鵲飛樹頭綠蒲紫菱蓋碧流誰家狂客愛雲  
水日日獨來城下游

湖南曲

瀟湘多別離風起芙蓉洲江上人已遠夕陽滿中流  
鴛鴦東南飛飛上青山頭

春水曲

鴨鴨嘴啞啞青蒲生春水狹蕩漾木蘭船中有雙少年少年醉鴨不起

送遠曲

吳門向西流水長水長柳暗烟茫茫行人送客各惆悵話離叙別傾清觴吟絲竹鳴笙簧酒酣性逸歌猖狂行人告我挂帆去此去何時返故鄉殷勤振衣兩相囑世事近來還淺促願君看取吳門山帶雪經春依舊綠行人行處求知親送君去去徒酸辛

楚妃怨

湘雲初起江沉沉君王遙在雲夢林江南雨多旌戟

暗臺下朝朝春水深章華殿前朝下國君心獨自終  
無極楚兵滿地兼逐禽誰用一身騁筋力西江若翻  
雲夢中麋鹿死盡應還宮

春日行

春日融融池上暖竹芽出土蘭心短草堂晨起酒半  
醒家僮報我二有園花已字滿頭上皮冠未曾整直入花  
間不尋逕樹樹殷勤盡繞行攀枝未遍春日暝不用  
積金着青天不用服藥求神仙但願園裏花長好一  
生飲酒花間老

廢瑟詞



古瑟在匣誰復識  
玉柱顛倒朱絲黑  
千年曲譜不分  
明樂府無人傳  
正聲秋虫暗穿塵  
作色腹中不辯工  
人名幾時天下復  
古樂此瑟重奏雲門曲

洛陽行

洛陽宮闕當中州  
城上峩峩十二樓  
翠華西去幾時  
返島巢乳鳥藏蟄  
燕御門空鎖五  
十年稅彼農夫修  
玉殿六街朝暮鼓  
鼙禁兵持戟守  
空宮百官日月  
拜章表驛使相  
續長安道上陽  
宮樹黃復綠野  
豸入苑食麋鹿  
陌上老翁雙淚  
垂共說武皇巡  
幸時

懷別

僕人驅行軒低昂出我門離堂無畝客席上唯琴樽  
古道隨水曲悠悠繞荒村遠程未奄息別念在朝昏  
端居愁歲永獨此畝輕景豈無經過人尋嘆門巷靜  
君如天上雨我如屋下井無因同波流願作形與影

離婦

十載來夫家閨門無瑕疵薄命不生子古制有分離  
託身言同穴今日事乖違念君終棄捐誰能強在茲  
堂上謝姑嫜長跪請離辭姑嫜見我往將決復沉疑  
與我古時釧畝我嫁時衣高堂拊我身拊一作撫哭我於  
路隍昔日初爲婦當君貧賤時晝夜常紡績不得事

蛾眉辛勤積黃金濟君寒與饑洛陽買大宅邯鄲買  
侍兒夫婿乘龍馬出入有光儀將爲富家婦永爲子  
孫資誰謂出君門一身上車歸有子未必榮無子坐  
生悲爲人莫作女作女實難爲

新桃

桃生葉婆娑枝葉四面多高未出牆顛蒿莧相凌摩  
植之三年餘今年初試花秋來未成實其陰良已嘉  
青蟬不來鳴安得迅羽過常恐牽絲虫蒙羃成網羅  
顧託戲童兒勿折吾柔柯明年結甘實磊磊充汝家

惜花

濛濛庭樹花墜地無顏色日暮東風起飄揚玉塔側  
殘蓋在猶稀青條聳復直爲君結芳實令君勿嘆息

古風二十七首

董公詩

湯中謂此篇與學仙樂天所稱謂可下誨藩臣上諷人主

誰主東諸侯元臣隴西公旌節居汴水四方皆承風  
在朝四十年天下誦其功相我明天子政成如太宗  
東方有艱難公乃出臨戎單車入危城慈惠安群兇  
公謂其黨言汝材甚驍雄爲我帳下士出入衛我躬  
汝息爲我子汝親我爲翁衆皆相顧泣無不和且恭  
其父教子義其妻勉夫忠不自以爲資奉上但願顯

公衣無文采公食少肥濃所憂在萬人人實我寧空  
輕刑寬其政薄賦施租庸四郡三十城不知歲饑凶  
天子臨朝喜元老置在東今聞揚盛德就安我大邦  
百辟賀明主皇風恩賜重朝廷有大事就決其所從  
海內旣無虞君臣方肅雍端居任僚屬宴語常從容  
翩翩者蒼烏來巢於林叢甘瓜生塲圃一蒂實連中  
田有嘉穀異隴畝穗亦同賢人佐聖人德與神明通  
感應我淳化生瑞我地中昔者此州人但矜馬與弓  
今公施德禮自然威武崇公與其百年受祿將無窮

學仙

樓觀開朱門樹木連房廊中有學仙人少年休穀糧  
高冠如芙蓉霞月披衣裳六時朝上清佩玉紛鏘鏘  
自言天老書祕覆雲錦囊百年度一人妄泄有災殃  
每占有仙相然後傳此方先生坐中堂弟子跪四廂  
金刀截身髮結誓焚靈香弟子得其訣清齋入空房  
守神保元氣動息隨天罡爐燒丹砂盡晝夜候火光  
藥成既服食計日乘鸞鳳虛空無靈應終歲安所望  
勤勞不能成疑慮積心腸虛羸生疾癩壽命多天傷  
身歿懼人見夜埋山谷傍求道慕靈異不如守尋常  
先王知其非戒之在國章

公衣無文采公食少肥濃所憂在萬人人實我寧空  
輕刑寬其政薄賦施租庸四郡三十城不知歲饑凶  
天子臨朝喜元老置在東今聞揚盛德就安我大邦  
百辟賀明主皇風恩賜重朝廷有大事就決其所從  
海內旣無虞君臣方肅雍端居任僚屬宴語常從容  
翩翩者蒼鳥來巢於林叢甘瓜生塲圃一蒂實連中  
田有嘉穀異隴畝穗亦同賢人佐聖人德與神明通  
感應我淳化生瑞我地中昔者此州人但矜馬與弓  
今公施德禮自然威武崇公與其百年受祿將無窮

學仙

樓觀開朱門樹木連房廊中有學仙人少年休穀糧  
高冠如芙蓉霞月披衣裳六時朝上清佩玉紛鏘鏘  
自言天老書祕覆雲錦囊百年度一人妄泄有災殃  
每占有仙相然後傳此方先生坐中堂弟子跪四廂  
金刀截身髮結誓焚靈香弟子得其訣清齋入空房  
守神保元氣動息隨天罡爐燒丹砂盡晝夜候火光  
藥成旣服食計日乘鸞鳳虛空無靈應終歲安所望  
勤勞不能成疑慮積心腸虛羸生疾癩壽命多天傷  
身歿懼人見夜埋山谷傍求道慕靈異不如守尋常  
先王知其非戒之在國章



沈千運舊居

汝北君子宅我來見頽墉亂離子孫盡地屬隣里翁  
土木被丘墟蹊路不相通舊井蔓草合牛羊墜其中  
君辭天子書放意任體躬一生不自力家與逆旅同  
高議切星辰餘聲激瘖聾方將旌舊閭百歲可封崇  
嗟其未積年已爲荒林叢時豈無知音音作莫能敦  
此風浩蕩竟無覩我將安所從

懷友

人生有行役誰能如草木別離感中懷乃爲我桎梏  
百年受命短光景良不足念我別離者願懷日月促

平地施道路車馬往不復空知爲良田秋望禾黍熟  
端居無儔侶日夜禱耳目立身難自覺常恐恐作憂  
與辱窮賤無閒暇疾癘多嗜慾我思携手人逍遙任  
心腹

寄韓愈

野館非我室新居未能安讀書避塵雜方覺此地閒  
過郭多園墟桑果相接連獨游竟寂寞如寄空雲山  
夏景常晝毒密林無鳴蟬臨溪一盥濯清去肢體煩  
出林望曾城君子在其間戎府草章記阻我此游盤  
憶昔西潭時並持釣魚竿共忻得魴鯉烹鱸于我前

幾朝還復來嘆息時獨言

別段生

與子骨肉親願其長相隨况離父母傍從我學詩書  
同在道路中講誦亦未窺爲文于我前日夕生光儀  
行役多疾癘賴此相扶持貧賤事俱難今日有別離  
我去秦城中子畝汴水湄離情兩飄斷豈異風中絲  
幼年獨爲客舉動難爲宜努力自脩勵長如見我時  
我時登山岡再揖問還期還期在新年勿怨歡會遲

贈姚怱

漏天日無光澤土松不長君今職下位志氣安得揚

白髮文思壯才爲國賢良無人識高韻薦于天子傍  
况我愚朴姿強趨利名場遠同于貴人身舉固難彰  
昔逢汴水濱今會習池陽豈無再來期顧恐非此方  
願爲石中泉不爲瓦上霜離別勿復道所貴不相忘

傷于鵠

西山無逸人忽覺大國貧良玉沉幽泉名爲天下珍  
野性踈時俗再命乃從軍氣高終不合去如鏡上塵  
我初有章句相合者惟君今來吊嗣子對隴燒斯文  
耕者廢其耜爨者絕其薪苟無新衣裳曷用光我身  
奠回徒再拜昔意安能陳徒保金石韻千載人所聞

和李僕射西園

見木鐸集通司業詩之別名

過午歸閒處西亭敞四簷高眠着琴枕散帙檢書籤  
印在休通客山晴好捲簾竹涼蠅少到藤暗蝶爭潛  
晚鵲頻驚喜踈蟬不許拈石苔生紫點欄藥吐紅尖  
虛坐詩情遠幽探道事兼所營當勝地雖儉復誰嫌

獻從兄

悠悠旱天雲不遠如飛塵賢達失其所沉飄同衆人  
擢秀登王畿出爲良使賓名高滿朝野幼賤誰不聞  
一朝遇讒邪流竄八九春詔書近遷移組綬未及身  
冬井無寒水玉潤難爲焚虛懷日迢遙榮辱常保純

我念出游時每吟康樂文願言靈溪期聊欲相依因

南歸

促促念道路四支不常寧行車未及家天外非盡程  
骨肉望我歡鄉里望我榮豈知東與西憔悴竟無成  
天寒苦夜長窮者不念明懼離其寢寐百憂傷性靈  
世道多險薄相勸異忠誠遠游無知音不如商賈行  
達人有常志愚夫勞無營舊山幸未賣言歸樂此生

臥疾

身病始知道臥讀神農經空房夜台燈四壁青熒熒  
羈旅逐人歡貧賤還自輕今來問良醫乃知病所生

僮僕各相憂杵臼無停聲見我形憔悴勸藥語丁寧  
春雨枕席冷窓前新禽鳴開門起無力遙愛鷄犬行  
服藥察耳目漸覺如酒醒方悟養生者不為憂患并

贈孟郊

歷歷天上星沉沉水中萍幸當清秋夜流影及微形  
君生衰俗間立身如禮經淳意發高文獨有金石聲  
才名振京國歸省東南行停車楚城下顧我不念程  
寶鏡曾墮水不磨難自明苦節居貧賤所知賴友生  
歡會方別離戚戚憂慮并安得在一方終老無送迎

城南

漾漾南澗水來作曲池流言尋參差島曉榜輕盈舟  
萬繞不再止千尋盡孤幽藻澁訝人重萍分指魚遊  
繁苗毳下垂密箭翻迴轉曝鱗亂自墜陰藤斜相鈎  
臥蔣黑米吐翻芰紫角稠橋低競俯僂亭近閒夷猶  
目爲逐勝朗手因掇芳柔漸喜游來極忽疑歸無由  
氣狀雖可覽纖微諒難搜未聽主人賞徒愛清華秋

夜懷

窮居積遠念轉轉迷所歸幽蕙零落色暗螢參差飛  
病生秋風簾淚墮明月衣無愁坐寂寞重使奏清微

奉和舍人叔直省時思琴



藹藹紫微直秋意深無窮滴瀝仙閣漏肅穆禁池風  
竹月泛涼影萱露澹幽叢地清物態勝宵閒琴思通  
時屬雅音際迴疑虛抱中達人掌樞近常與隱默同

野寺後池寄友

佛寺連野水池幽夏景清繁木蔭夫渠時有水禽鳴  
通溪岸蹇斷分渚流復縈伴僧鐘磬罷月來池上明  
友人竟不至東北見高城獨游自寂寞况此恨盈盈

寄別者

寒天正飛雪行人心切切同爲萬里客中路忽離別  
別君汾水東望君汾水西積雪無平岡空山無人蹊

羸馬時倚轅行行未遑食下車勸童僕相顧莫歎息  
詎知佳期隔離念終無極

病中寄白學士拾遺

秋亭病客眠庭樹滿枝蟬涼風繞砌起斜影入牀前  
梨晚漸紅墜菊寒無黃鮮倦游寂寞日感嘆蹉跎年  
塵歡久消委華念獨迎延自寓城闕下識君弟事焉  
君爲天子識我方沉病纏無因會同語悄悄中懷煎

雨中寄元宗簡

秋堂羸病起盥漱風雨朝竹影冷踈澁榆葉暗飄蕭  
街徑多墜果墻隅有蛻蜩延瞻游步阻獨坐閒思饒

君居應如此恨言相去遙

峴花

可憐峴邊樹紅葉發青條東風吹渡水衝着木蘭橈

惜花

春潭足芳樹水清不如素幽人愛華景一一空山暮  
月出潭氣白游魚暗衝石夜深春思多酒醒山寂寂

別于鵠

離燈及晨輝行人起復思出門兩相顧青山路逶迤

野草

幕幕野田草草中牛羊道古墓無子孫白楊不得老

秋山

秋山無雲復無風  
溪頭看月出深松  
草堂不聞石床  
靜葉間墜露聲重重

山禽

山禽毛如白練帶  
棲我庭前栗樹枝  
獼猴夜半來取  
栗一雙中林向月飛

祭退之

嗚呼吏部公其道誠巍昂  
生爲大賢姿天使光我唐  
德義動鬼神鑒用不可詳  
獨得雄直氣發爲古文章  
學無不該貫吏治得其方  
三次論諍退其志亦剛彊

再使平山東不言所謀臧薦待皆寒羸但取其才良  
親朋有孤稚婚姻有辦營如彼天有斗人可爲信常  
如彼歲有春物宜得華昌哀哉未申施中年遽殂喪  
朝野良共哀矧於知舊腸籍在江湖間獨以道自將  
學詩爲衆體久乃溢笈囊畧無相知人黯如霧中行  
北遊偶逢公盛語相稱明名因天下聞傳者入歌聲  
公領試士司首薦到上京一來遂登科不見苦貢場  
觀我性朴直乃言及平生由慈顙朋黨骨肉無以當  
坐令其子拜常呼幼時名追招不隔日繼踐公之堂  
出則連轡馳寢則對榻床搜窮古今書事事相酌一酌

作量有花必同尋有月必同望爲文先見草釀熟借  
斟共觴新果及異鮭無不相待嘗到今三十年曾不少  
異更公文爲時帥我亦有微聲而後之學者或號爲  
韓張我官麟臺中公爲大司成念此委末秩不能力  
自揚特狀爲博士始獲升朝行未幾享其資遂忝南  
宮郎是事賴拯扶如屋有棟梁去夏公請告養疾城  
南庄籍時官休罷兩月同游翔黃子陂岸曲地曠氣  
色清新池四平漲中有蒲荇香北臺臨稻疇茂柳多  
陰涼板亭坐垂釣煩苦稍已平共愛池上佳聯句舒  
遐情偶有賈秀才來茲亦間并移船入南溪東西縱

篙根劃波激船舫前後飛鷗鷺回入潭瀨下網截鯉  
與魴踏沙掇水蔬樹下烝新秔日來相與嬉不知暑  
日長柴翁携童兒聚觀於岸傍月中登高灘星漢交  
垂芒釣車擲長綫有獲齊歡驚夜闌乘馬歸衣上草  
露光公爲遊谿詩唱咏多慨慷自期此可老結社於  
其鄉籍受新官詔拜恩當入城公因同歸還居處隔  
一坊中秋十六夜魄圓天差晴公旣相邀畱坐語於  
堦楹乃出二侍女合彈琵琶箏臨風聽繁絲忽遽聞  
再更顧我數來過是夜涼難忘公疾浸日加孺人視  
藥湯來候不得宿出門每迴遑自是將重危車馬候

縱橫門僕皆逆遣獨我到寢房公有曠達識生死爲  
一綱及當臨終晨意色亦不荒贈我珍重言傲然委  
衾裳公比欲爲書遺約有修章令我署其末以爲後  
事程家人號於前其書不果成子符奉其言甚於親  
使令魯論未訖注手跡今微茫新亭成未登閉在莊  
西廂書札與詩文重疊我笥盈頃息萬事盡腸情多  
摧傷舊堊盟津北野定動鼓鉦柳車一出門終天無  
迴箱籍貧無贈貲曷用申哀誠衣器陳下帳醪餌奠  
堂皇明靈庶鑒知髣髴斯來饗





野居

此一首當補在古風中城南後

貧賤易爲適荒郊亦安居端坐無餘思彌樂古人書  
秋田多良苗野水多遊魚我無耒與網安得充廩厨  
寒天白日短簷下煖我軀四肢暫寬柔中腸鬱不舒  
多病減志氣爲客足憂虞况復時節晚覽物空踟躕

唐張司業詩集卷七

唐張司業詩集卷八

一十九首

山中醜人

山中日煖春鳩鳴逐水看花任意行  
向晚歸來石窓下  
菖蒲葉上見題名

岳州晚景

此詩舊選皆云張正言作

晚景寒鴉集秋聲遠雁歸  
水光浮日去霞彩映江飛  
洲白蘆花吐園红柿葉稀  
長沙卑濕地九月未成衣

水

已上三首見木鐸集

蕩漾空沙際虛明入遠天  
秋光照不極鳥色去無邊

勢引長雲濶波輕片雪連汀洲杳難測萬古覆蒼烟

送安法師

出郭見落日別君臨古津  
遠程無野寺宿處問何人  
原色不分路錫聲遙隔塵  
山陰到家節猶及蕙蘭春

寄靈一上人初歸雲門寺

寒山白雲裏法侶自招携  
竹逕通城下松門隔水西  
方同沃洲去不作武陵迷  
彷彿遙看處秋風是會稽

夏日閒居

無事門多閉偏知夏日長  
早蟬聲寂寞新竹氣清涼  
閒對臨書案看移曬藥牀  
自憐歸未得猶寄在班行

老將

髮衰頭似雪行步急如風不怕騎生馬猶能挽硬弓  
兵書封錦字手詔滿香筒今日身憔悴猶誇定遠功

秋閨

秋風窓下起旅雁又

一作向

南飛日日出門望家家行

客歸無因見邊使空待寄寒衣獨閉青樓暮烟深鳥  
雀稀

山中春夜

寂寂春山靜幽人歸臥遲橫琴當月下壓酒及花時

冷露濕茅屋暗泉通

一作衝

竹籬西峰採芝

一作藥

伴此

夕恨無期

訓浙東元尚書見寄綾素

越地繒紗紋樣新  
遠封來寄學曹人  
便令裁制爲時服  
頓覺光榮上病身  
應念此官同棄置  
獨能相賀更殷勤  
三千里外無由見  
海上東風又一春

贈項斯

端坐吟詩妾忍飢  
萬人中覓似君稀  
門連野水風長到  
驢放秋原夜不歸  
日煖剩收桑落葉  
天寒更着舊生衣  
曲江庭上頻頻見  
爲愛鷓鴣雨裏飛

題故僧影堂

香消雲鎖舊僧家  
僧剝殘形半壁斜  
日暮松烟寒漠漠  
秋風吹破絳蓮花

弱柏院僧影堂

弱柏倒垂如線蔓  
簷頭不見有枝柯  
影堂香火長相續  
應得人來禮拜多

聯句

會合聯句

韓愈  
張徹

孟郊

離別言無期  
會合意彌重籍  
病添兒女戀  
老喪丈夫

勇愈

劍心知未謝  
詩思猶孤聳

郊

愁去劇箭飛  
懼來

若泉湧徹

析言多新貫  
攄抱無昔壅

籍

念難須勤追



悔易勿輕踵愈吟巴山卓犖說楚波堆壟郊馬辭虎

豹怒舟出蛟鼉恐徹狂禽時孤軒禽作幽狖雜百種

愈瘴衣常腥膩蠻器多踈冗籍剝苔吊斑林角飯餌

沉塚愈忽爾銜遠命歸歟舞新寵郊鬼窟脫幽妖天

居覲清拱愈京游步方振謫夢意猶恂籍詩書誇舊

知酒食接新奉愈嘉言寫清越瘡病失臄腫郊夏陰

偶高庇霄魄接虛擁愈雪絃寂寂聽茗碗纖纖捧郊

馳輝燭浮螢幽響泄潛菴愈詩老獨何心江疾有餘

燠郊我家本漚穀有地界臯鞏徹休迹憶沉冥峨冠

慙闕郊升朝高轡逸振物羣聽悚徒言濯幽泌誰

與薙荒茸

籍

朝紳鬱青綠馬飾曜珪琪

國讐未銷

鏢我志蕩邛隴

郊

君才誠倜儻特論方洵溶

一作洵

格言多彪蔚懸解無桎拳張生得淵源寒色拔山豕

堅如撞群金眇若抽獨蛹

愈

伊余何所擬跛鼈詎能

踊塊然墜

一作墜

岳石飄爾胃巢託

郊

龍旆垂天衛雲

韶凝禁甬

籍

君胡眠安然朝鼓聲洵洵

愈

春池汎舟聯句

裴度賈餗

崔羣

劉禹錫

鳳池新雨後池上好風光

禹錫上相公

取酒愁春盡畝賓

喜日長

度送戶部

柳絲迎畫舸水鏡寫雕梁

羣送賈閣長

潭洞

迷仙府烟霞認醉鄉

餗送張司業

鶯聲隨笑語竹色入壺

觴籍送晚景含澄澈時芳得艷陽禹錫飛鳧拂輕浪

綠柳暗回塘度逸韻追安石高居勝辟疆群杯停新

令舉詩動彩箋忙餽顧謂同來客歡游不可忘籍

宴興化池亭送白二十二東歸裴白劉

東洛言歸去西園告別來白頭青眼客池上手中杯

度離瑟殷勤奏仙舟委曲回征輪今欲動賓閣爲誰

開禹錫坐弄琉璃水行登淥縹苔花低妝炤影萍散

酒吹醅居易岼蔭新抽竹亭香欲變梅隨游多笑傲

遇勝且徘徊籍澄澈連天鏡潺湲出地雷林塘難共

賞鞍馬莫相催度信及魚還樂機忘鳥不猜晚晴槐

起露新暑石添苔

禹錫

擬作雲泥別猶思頃刻陪歌

停珠貫斷飲罷玉峰頽

居易

雖有消搖志其如磊落

才會當重入用此去肯悠哉

籍

首夏猶清和聯句

裴

白

劉

記得謝家詩清和即此時

居易

餘花數種在密葉幾

重垂

度

芳謝人人惜陰成處處宜

禹錫

水萍爭點綴

梁燕共追隨

行式

亂蝶憐踈蕊殘鷺戀好枝

籍

殘未歇雲勢漸多奇

居易

單服初寧體新篁已出籬

度

與春爲別近覺日轉行遲

禹錫

遶樹風光少侵堦

苔蘚滋

行式

唯思奉歡樂長得在西池

籍

薔薇花聯句

裴

白

劉

似錦如霞色連春接夏開

禹錫

波紅分影入風好帶

香來

度

得地依東閣當階奉上台

行式

淺深皆有態

次第暗相催

禹錫

滿地愁英落綠隄惜棹回

度

芳濃

濡雨露明麗隔塵埃

行式

似着胭脂染如經巧婦裁

居易

奈花無別計只有酒殘杯

籍

西池落泉聯句

裴

白

劉

東閣聽泉落能令夜興多

行式

散時猶帶沫淙處却

跳波

度

偏洗磷磷石還驚泛泛鷺

籍

色青塵不染光

白月相和

居易

噴雪繁松竹攢珠濺芰荷

禹錫

對吟

時合響觸樹更搖柯籍照圃紅分藥侵堦綠浸莎居

日斜車馬散餘韻逐鳴珂禹錫

張司業詩集世所傳者有歷陽盱江二本咸編次不全番陽湯侍講司諫中迺以家藏元豐八年寫本刻而傳之其間篇什頗多於二本辛酉歲余移告家居因合三本校之得其樂府古風近體詩共七十九首錄于昆陵蔣氏刊本後錯字亦稍為正惜未能盡去也余嘗觀唐史稱司業為詩長于樂府多警句白太傅讀其集賦詩

曰張公何為者業文三十春尤工樂府詞舉代少其倫而姚秘監又贈詩曰妙絕江南曲淒涼怨女詩古風無敵手新語是人知其為當時所推服者如此迨后若張文懿公最重籍作荆公絕句云蘇州司業詩名老樂府皆言妙入神其為異代所稱仰也又如此然則司業之詩是可遺其一耶今增定之則滄海之珠庶幾無遺延津之劍得以復合非敢附于四公之後也七月既望識

唐張司業詩集卷八